


序

谿谷集 卷三

卷三





谿谷先生集卷之五

序十四首

送巡察鄭公按湖西序

先人之沒今十有二年而執友之處朝者甚多不肖孤蒙未省事不能徧事而受教顧時時獲見於守夢鄭元生焉今年春先生自前國子祭酒承命按湖右時維適在湖中命至人士相慶既歸即謁門下先生溫言誨飭且曰子其為文賸我維竊念古人贈言蓋出於箴規之義故或弟子而請於師或朋友相贈未嘗有施於所尊者今先生於維



父友也又嘗辱一言之教則是道之所在何敢當  
贈言之義以是辭再三不得命退而伏思之蕃宣  
之任蓋一方風化係焉其為職在乎明正道淑人  
心以贊朝廷化理至如軍民之政錢穀甲兵之計  
莫非其事要之皆非先務之急也湖嶺三路人材  
之府庫而文獻之淵藪國家之所恃以為根本者  
也嶺南沐先賢之教右文尚義其民不偷藹然有  
君子之遺風焉不幸先正既遠而末學橫議矯訐  
不遜其弊有不可勝言者河西高峯起於湖南而  
名人繼作文學蔚然雖風習之美或讓於嶺南而



世稱多士之區未有舍是者焉自世道喪而邪說  
作朋比締構訐亂軋擊使善類無所容羅全之間  
大半為鬼域之窟穴矣惟湖西處乎其間盖有二  
南之文明而無其弊故識者皆稱湖西易治苟在  
上者善道守之鄒魯之化不難致矣雞龍之西熊津  
之南有沙溪先生講學於其間推明先正之道以  
為教人士多宗之夫是邦之不染於二南之汙者  
推其所自盖有賴乎此耳今先生與沙溪同道而  
加之以專制之勢付畀之責操可為之道而處可  
為之地則較之沙溪又有順風之勢焉果能因其



教而輔翼之闡明發揮鼓舞振厲使湖中士習翕然丕變一出於正旁及二南亦皆棄其舊汙聞風而興起則向所謂明正道淑人心者庶幾在是而生乎明德新民之學亦可以無負矣方今聖上新開講筵經學之士皆欲近清光承顧問以贊成聖德之萬一林居巖棲之士莫不洋洋動氣而先生受命湖海之遠不得以誠正之說啓沃吾君有志之士莫不咨嗟歎惜而維之愚獨以為君子之展其學何間內外苟先生之道行乎湖中而被乎二南使國家根本之地得其理而文明以盛



則格君化俗之士將自此蔚興而可以資教化成  
至治其利之博顧何小於在內哉小子顛蒙誠未  
有知既承眷眷之命不敢默然而已謹以是獻焉

送高書狀善行赴京師序

高君善行之將走京師也踵門而詫張子曰今吾  
出於偏邦遊於上國涉乎天子之庭自謂足以  
盡天下之大觀也吾子以為何如張子曰夫自大  
觀小者失之侈自小觀大者失之餒餒則喪其守  
喪其守則視而無所見聽而無所聞矣故人必忘  
於大然後可以觀於大夫天之畀於人者非以其



霸霸明明者與霸霸明明者之在於人也未嘗以  
古今通塞而夷夏豐嗇也故人能知霸霸明明者  
之在我而無待於外則物不以我大無入而不自  
得物皆供吾之觀而不能奪吾之守其於行天下  
也豈不綽綽有餘裕哉中國之於我邦也華夷之  
辨大小之分則姑不論延人之所歆豔而樂道之  
者特以壇土之博大山川之雄闊城闕之閎傑貨  
寶珍怪之充物人民文采之繁麗而已故觀於其  
中者目駭神怡恍然自失如井蛙之驚於海也是  
皆不知至貴之存乎我而徒眩於外物者耳上古



之世大朴未散天子之居僅有茅茨采椽王圻不  
過千里沉珠於淵捐金於山居居于子而與萬物  
並者此何等時也而與今之世何如也占之齧也  
何可陋今之侈也何足夸夫古之不可陋今之不  
足夸者非以其存乎內者耶苟以存乎內者而已  
矣則我邦雖偏且陋何獨羨於中國哉橫目之徒  
飢食渴飲喜笑怒詈耳聰而目明榮善而恥惡者  
普天之下皆同耳存之則為君子而萬物為之後  
去之則為小人而役於萬物如斯而已尚可以外  
物之豐約而自喪其所守哉若乃禮教之備人物



之盛可觀而可法者此固中國之所以為懿也然  
皆人所固有而無間於華夷者彼特先獲焉耳取  
於彼所以求於己也彼固不當以此自大而我亦  
不可以此自小也昔者季子札之聘於中國也吳  
固未離於夷也其於中國之禮樂文章目所未睹  
而耳所未聞也及其觀於周樂也其言如著龜神  
明無一之不中彼周魯之士大夫童而習之日用  
而不知者皆是也由此觀之亦存乎其人而已安  
在其夷與華之異也今子其亦無爽乎嚮嚮明明  
之在我者而勿為接於耳目者所眩奪兢兢焉惟



以敏於使事而不辱君命為心焉則從此以往四  
千里之遠凡其山河城郭宮室人民文采之壯麗  
瓌偉可喜而可駭者舉皆供吾之觀而不能奪吾  
之守而中國之人亦將曰季子之後數千載復於  
子而睹之矣豈不韙歟高君於是起而謝曰微吾  
子之教某也無以知所以觀於大者而殆乎其辱  
吾君之命也夫請書其說以為贈行焉

揚馬賦抄序

賦者古詩之流蓋居六義之一焉詩人之賦麗以  
則其言雍容典雅辭近而指遠故能列於六經藏



於博士官學士大夫世守而習之詩變而離騷作  
離騷者南楚怨慕之聲也其音節疾徐固變於三  
百篇若其發於情性依於規諷有補於民彞物則  
之重無二致焉即其餘事亦足為詞賦祖矣西京  
之隆成都有司馬長卿者以賦名能為宏博鉅麗  
之詞汪洋恣睢馳騁從橫蓋祖述離騷而體格稍  
變說者謂神化所及非虛言也揚雄氏後出慕而  
倣之以沉深老健之氣發為竒崛齧牙之語雖奔  
軼絕塵或稍後於文園而步驟轍跡如出一軌斯  
兩家者誠千古詞林之標極也自是之後東都有



班孟堅張平子魏晉有何平叔左太冲諸人竭力  
摹擬而未能得其影響蓋神藻絕藝獨秉天機終  
非學力所就也吾友鄭紫元妙年善屬文既以詞  
賦冠上舍選而其好古文詞益篤乃悉取長卿子  
雲諸賦倩錦陽都尉手寫編成屬余序之且曰揚  
馬沒而世無賦外此無足溷吾目矣余謂今世以  
詞賦取士顧博士家所業自有近代型範即六朝  
唐宋已過高矣何以揚馬為然余竊念國家撫  
中興之運宮闕苑囿制度文物稍稍振作日新矣  
石渠金馬之上雖不乏大手筆甘泉上林鋪張揚



厲之作自當屬之其人非可容易也紫元今雖踏  
蹬決非久於布衣異日朝廷有大述作則凌雲吐  
鳳之手其庸可得以辭諸然則今日汲汲於是編  
者夫誰曰太早計哉如余畸於世者雖齒髮未衰  
望斷尚書筆札惟當放浪山澤傲睨風雲時為餐  
英飲露登山臨水之詞以自抒其湮鬱而已紫元  
以為如何

賀同知申公慶壽宴詩序

同知申公生於嘉靖癸未至萬曆乙卯閱寒暑已  
九十有三矣其精力不衰能讀蠅頭字快嚼大齋



硬腊登降層軒峻陞不杖不扶控快馬造請親故  
慶吊吉凶不避寒暑風雨說者咸謂人有如公之  
壽而不能如公之彊健有如公之彊健而不能如  
公之精勤不惰也蓋未有不目公為地行仙者  
主上以公高年命進二品秩以寵異之公之胤靈  
川公為設慶壽之宴薦紳諸公與其席者皆為詩  
文以頌詠其事既而靈川公授簡於維曰子雖不  
與是會亦不可無一言維辭謝不獲命因請於靈  
川公曰老先生之得此壽也必有其術亦嘗烹粉  
草木煉熬金石以充服食乎亦嘗吹噓呼吸吐故



納新以為脩養乎亦嘗醮星斗事仙靈精虔齋潔  
以祈福祐而禱長年乎靈川公曰否無有是也我  
公之處世也信口而餐無為饑而已矣從心而行  
無為僻而已矣飢食渴飲夏葛冬裘日出作日入  
息皆與人同而已矣夫何術之有維作而言曰有  
是哉此老先生之所以得此壽也天下事有不以  
不求而得無為而致者乎老聃之言曰為者敗之  
執者失之世之人規規於衛生以蘄久生者何適  
而非人欲也行人欲而俸天福若之何其能得之  
今老先生靄襟異骨得之天賦委命循理以膺難



老之錫焉蓋於所以養生者猶不數數况於所以  
傷生者乎脩是道以致其極則於所謂守一處和  
者亦樂矣千二百歲猶可馴致夫豈未滿百而形  
遽衰乎靈川公曰善維於是退而賦長句詩一篇  
以致禱頌之意焉

寄洪勉叔序

洪勉叔之南謫也余送之郊外欲有贈語以其迫  
於嚴程未暇為也勉叔既入海以書來曰海外無  
可以自遣者願得子之詩若文以慰別懷且用以  
自省也余乃進使者而問其風土美惡及勉叔起



居狀使者對曰巨濟在嶺南大海中瘴毒所聚地  
荒而人稀穹林大藪黃茆白草蒼蔚而極目行數  
十里不見人煙冬無積雪夏多淫雨虺蛇蝥蟲之  
毒備稍弛不免也土瘠艱食又值歲之歉販鬻之  
無貲稱貸之無所饋粥不給數口恒有菜色而公  
未嘗以是為戚也日閉戶讀書以自適瞻戀親闈  
之外惟不能忘情於京洛親舊欲得其文詞而如  
見其人焉余聞之不覺慘然而喟曰嗟乎地乃有  
若是惡哉而勉叔乃若是困哉顧勉叔之能安乎  
此則固矣無足異者夫勉叔之就此地非人與之



也自取之也既自取矣而又從而病之即婦孺不  
為是矣况勉叔乎勉叔一布衣也非有言責官守  
之不可廢者默則至安言則至危乃能舍至安而  
取至危此其擇之必審而執之必牢鼎鑊鉞鉞固  
且甘之嶺海蓋天幸也至是而猶不能無戚則終  
始本末不相坐矣勉叔必不然矣君子素其位而  
行無入而不自得此非可以強為也知此理之在  
我而不可以不盡則自外至者皆非與於我者如  
雲煙之過太空起滅萬變而太空恒湛如也非惟  
不足置欣戚於其中亦本自無可欣戚者也古之



人固有殺身以成名者死生亦大矣猶能知所去就况不至於死生者乎惟是遠違膝下不得以時奉晨昏之問此固人情之所不能懸解者然亦未如之何矣事之末如之何者君子亦安之而已矣劉元城奉母過嶺歷遍惡地終乃壽考康寧忠孝兩全古之君子遭此者多矣未必終於不幸也况今聖明在上陽春白日煦育萬類雖陰崖幽谷或似稍後然終必無所不到勉叔其可自怠哉其可自怠哉君子贈人以言勉叔於余又請之勤矣不可終默也聊為云云



詩史序 課作

自書契之作也著述寔廣體裁區別紀載世變昭  
示失得者謂之史陶冶性情叶之管絃者謂之詩  
此二者不可混亦不能兼也就其著于經者左史  
紀言右史紀動虞夏商周之典謨訓誥春秋之編  
年比史也而未嘗近乎詩列國之所陳太史之所  
采自里巷歌謠以至乎郊廟絃歌經之以風雅頌  
緯之以賦比興者皆詩也而未嘗近乎史降自秦  
漢遷固曄壽之稱良史也而未求之諷詠麗則之義  
則闕焉曹劉鮑謝之稱能詩也而未求之筆削詳核



之實則遠矣蓋人才有偏至作述無兼長歷數終  
古究觀藝林兼斯二美一舉而兩至者其惟唐杜  
甫氏詩史乎杜甫氏學識淵懿寸華鉅麗獨立一  
世高視千秋而時命大謬不為君相所知有名山  
石室之志而不能紬金匱玉版之秘以成一代之  
典以垂不朽之業有黼黻河漢之手而不能入金  
馬白虎之署以藻飾皇猷鼓吹風雅重遭喪亂顛  
沛流離寄命於逆旅餬口於四方上而感時事之  
艱危下而傷身世之阨窮俯仰得失悲歡豐約天  
時人事小大遠邇凡觸於目而感於心者一皆發



之於詩其言切其志深其事核而備其風刺婉而不隱至於邪正之辨治忽之幾尤娓娓致意焉格律精嚴文質得中溫柔敦厚之中自有衮鉞凡例之則即使董狐南史之徒簪筆執簡隨事而記之疇能加諸此乎嗚呼詩而經者非三百篇乎史而經者非書與春秋乎詩而史史而詩不經而得經之旨持一藝而兼作者之長者非吾杜甫氏詩史乎嗚呼至矣不可以加矣

送李從事尚古奉使日本序

今上踐阼之十載歲在丁巳日本使者款徵效琛



願敦鄰好朝廷嘉其嚮義議遣使答其意難慎使  
寸博簡朝列維時李君尚古以前尚書郎實膺下  
价之選行有日矣其友德水張維造而慰之曰尚  
古良苦夫日本不在溟海萬里外我嘗按之圖志  
自釜山而對馬自對馬而日歧自日歧而赤間海  
道各數百千里自赤間而抵其國都遷迤海港陸  
跋水涉者又不下數千里東南者四海之委也沃  
魚之墟尾間之壑皆在是焉風颯之所鼓盪幽怪  
之所恣睢大浪如山小浪如屋滔天而沃日者無  
時不然高桅欲折大帆欲倒蛟涎鱗齒之不及乎



身者僅咫尺耳此天下之至險也尚古生長京華  
出門所適不過數百里一朝行涉此險矣能無病  
乎李君奮然曰欵何子言之悞也丈夫生而有四  
方之志豈可媿媿守妻孥終老帷房之內哉况某  
奉 王命而使外國雖蹈湯火有不敢辭區區舟  
楫之難何足芥蒂於膏中哉維曰狡夷變詐百出  
獸心而人面今雖懷我好音通冠蓋之信一朝讒  
慝間其慮鬼神助其禍則義成在久惡成不及改  
或要我以難從之請強我以不可行之禮桀黠無  
道有不可測子將何以處之李君曰惡寧有此乎



日本之悔禍於我者于茲二紀矣 本朝政刑修  
明外內又安 聖天子所以宣威而耀德者亦無  
所不至彼既不能無請權於我又安能逆理生釁  
棄福而構禍哉萬一有此漢節在手吾已忘吾身  
矣况必無是理者乎維曰象胥輿臺紀綱之僕嗜  
利頑頓者憑依城社黷貨無厭足以辱國而取侮  
交際之際或餽以橐裝欲却則逆彼權欲受則傷  
吾庶子將何以處此乎李君曰刑法可以防小人  
之慾禮義可以制君子之行隸人之不循法度者  
則有三尺在彼何敢捐身而徇貨哉賓餽之稍無



名者可却則却之不可却則吾以餉陽侯耳不亦  
綽然有裕哉維曰是數者吾無以難子矣然尚古  
不有垂白二親我居平舞斑弄雖怡怡然無跬步  
之違一朝舍膝下之歡而作海外之後曠晨昏之  
奉而隔歲年之期將無上貽門閭之念下結姑妣  
之思乎李君憾然有問曰此某之不能懸解於中  
者然某亦有聞矣詩不云乎王事靡盬不遑將父  
夫業已背親而仕恩義固有時相奪矣况二親幸  
無恙健飯而某之行還遠不出浹歲竣事而歸將  
必上紓 聖主南顧之念而下為庭闈光寵此某



所以稍慰於方寸者也維曰然則尚古終無難於  
是役乎哉李君曰何敢然顧某實有怵惕於夙夜  
者矣壬辰之變萬世不可忘也今雖平氏滅而源  
氏興革命更始回心向順然斲之於義則凡日本  
之山川草木無非我讎也今既不能犁庭蹠血鞭  
秀吉之尸而灰其骨反以玉帛鍾鼓通其國而接  
其人雖羈縻撫綏之略不得不爾然匹夫之諒不  
能魚鱗然者矣先正之奉使日域者在麗有若鄭  
文忠在 本朝有若黃秋浦諸公其峻節足以標  
名教清操足以動殊俗卉服之欽聳誦義至于今



不裝今不佞於數公者無能為役而謬忝將命誠  
恐奉使無狀以上辱吾君之命而下獲戾於數  
君子者此某之所大懼也若乃懷安顧慮錄錄作  
女曹兒態者某雖不肖亦不至若是汙維於是蹶  
然起謝曰偉哉尚古之志也始也吾有難於尚古  
殆淺之為丈夫也退而錄其語以贖其行焉

送鄭評事紫元佐關西帥幕序

翼陽鄭紫元自館職出佐關西節度幕人謂紫元  
雅有凌雲聲妙齡策名標舉映人藹然館閣器也  
一朝誦其華藻而韜鈴是舉韞韋跼注從事戎旃



日與虎而冠者踉蹌堂皇間無論朝廷枉材即紫  
元亦必佗佗鬱抑作遷人貶士狀已何紫元過辭  
張子色益腴言益暢志氣揚揚類自得者張子異  
之以之言也詰焉紫元盱衡而應曰翦翦乎小夫  
之見也丈夫生世快意事有三焉第一遭時乘運  
展布志業握三寸不律鋪張鴻猷藻飾太平入則  
贊揚廊廟出則鎖鑰藩維尊主康時垂聲竹帛此  
上願也其次脫屣物累棲心玄虛探歷名山尋真  
訪道巖居川觀消搖世表亦是樂以忘死即二者  
俱不可得但携豪人快客酒肉如山歌舞滿眼沉



酣快適不知其他亦不失為阮步兵李青蓮之流  
也不佞少負志槩頗欲奮迅自效適會時命刺謬  
道之不行已知之矣家貧親老婚嫁未畢僣勉薄  
宦低顏風塵碌碌之膏無以耗磨乃今從宦西關  
西關故彌繁華鉅麗地屬壇場寧謚幕府少事惟  
當以聲酒綺羅以資跌宕直欲搥碎鐵甕蹋倒藥  
山而後已且聞妙香之勝近在几案蠲屐振策載  
千斛美酒直上毗盧絕頂頻視八極揮斥雲霞則  
於向三事者居然得其二焉茲行也何負於我而  
遽自戚戚哉張子曰善乎能自寬者然紫元之雅



志不應爾也吾聞滯境者累而不適翫物者惑而不樂是故哀樂相踵靜躁相逐達者之觀蓋異是也管絃珠翠不能移澹漠之操餐霞卧雲未嘗礙繁艷之娛斯而推之卑陬幕府者何以異於雍容臺省也馳驅鞍馬者何以異於偃仰齋閣也鞅掌關塞者何以異於翱翔京輦也無伸無屈無內無外無可樂也亦無可不樂也然則或人之為紫元歎然者固不足以知紫元而紫元所以應我者無亦非莊語也耶紫元作而謝曰謹受教

送陳奏上使月沙李先生赴皇都序



今 皇帝四十六年建州夷酋反罷陷邊障屠掠  
人畜 皇帝震怒詔諸將以明年之春舉兵討之  
于時本國亦發材官銳士數萬會王師進討師律  
否臧諸路兵皆不利我師亦大衄二帥囚於虜報  
聞 皇帝愍東師之不還降勅慰諭賜內府金幣  
萬計無何迺有流言潛扇謂我陰懷兩端廷臣至  
請舉漢家監護西域故事者我殿下聞之盡然驚  
懼教羣臣曰 皇朝之與我邦猶父子也子而貳  
於父天理所必無 聖天子明燭無隱流言必不  
入然不早辨之恐有投杼之惑宜慎簡使臣亟具



奏辨白先是大學士月沙李先生以不肯雷同廷  
議中白簡竢譴於郭外者二年與人之誦者皆曰  
是選也非月沙不可頃之內批下特起先生為  
上使溫旨慰諭至稱以華國手先生屢辭皆不  
許有竊議者曰是行也其能濟乎維應曰何為其  
不濟也往者丁應泰之誣我國也其鍛鍊齟齬可  
謂措且深矣然而一介赴翹渙然立釋應泰尋亦  
纍死爾時奉使者實故相鰲城公而先生為之貳  
奏牘之出先生手者天下傳誦之蓋聖天子所  
以寵綏藩服及先生之取重華夏有自來矣况今



本國已效討賊同仇之義 聖朝旋有宣勅寵賚  
之恩上仁下忠胥盡之矣雖有二停之在虜庭而  
狡虜復能飛謀釣誘欲交間我者萬端是豈足以  
翳 天鑑而虧 帝度哉若夫監護之舉本出於  
漢家之末策所以制羈縻化外者終不當以此施  
之我也夫以 殿下事大之誠與先生專對之才  
仰籲于仁覆之天何慮乎事之不濟哉然維獨有  
未能舍然者夫人之辨謗以言辨也易以行辨也  
難得人之無見罪也易得人之無見疑也難故曰  
止謗莫如自修內省不疚何恤人之言况以千乘



之國被言於萬乘之主而乃欲以區區頰舌強自  
解說於以感人不亦淺乎我國之事天朝也奉  
令承教可幸無罪然而衛言流行交亂罔極誠不  
容無辨亦不可強辨也益慎侯度罔敢失墜修明  
大義誓不與逆虜共戴天志索弊賦以待王師之  
興而戮力焉掃清臊羯奏功天子設有利鈍寧  
以國斃如是而流言有不息義聲有不振者乎不  
然徒欲明目張膽喋喋而磬磬焉則天朝之貌  
與我也固矣心與我也未敢必也昔者韓長孺之  
事梁孝王也既為梁王游詞緩頰以解天子之怒



又能極言切諫感悟王心使詭勝之奸無所容而  
王之忠孝聞於漢庭夫長孺特一智略士耳猶能  
辨此况君子之事主也格心正事靡所不致其極  
而事之難言者亦未有如梁國陰事者哉今我  
殿下起先生於廢累委以使事虚心注意樂聞啓  
沃而先生必能以上所云者委曲獻替以開上  
心使東藩臣職粹然盡道無纖芥可指則三韓禮  
義之懿昭乎若揭日月而行流言之辨何煩先生  
飲冰之勤哉然則是行之難也不在於將命之敏  
而在於納誨之忠不在於出壇之事而在於前席



之對我 殿下起先生而用之者意者其在茲乎  
其在茲乎會先生趣裝且行徵言於維先生維父  
友也不敢以曼辭對謹錄此以復若乃原隰之艱  
獨賢之勞四方之士固有為先生竊歎者然此雅  
非先生所存於中者故維不敢舉焉

四吾堂詩序

李文大載甫自沔上過維海莊精舍談間請曰自  
吾之客于沔也曾無蠃蛭蝸殼之廬可以容吾膝  
而庇吾軀者迺今拮据始有斗大小屋以避燥濕  
寒燠隘陋甚矣然吾居而適之不啻若大廈然吾



嘗聞通人權汝章有言曰食吾田飲吾泉守吾夫  
終吾年斯語也吾竊取之以名吾居曰四吾夫余  
何能克是言願吾子之文之也維作而應曰唯唯  
自夫道之汚也士之不能安其分也久矣即有安  
其分矣而能無適乎其天者鮮矣即有志乎茲二  
者而能久而無遷者滋鮮矣耕田而食鑿井而飲  
守志善道不願乎其外若將終身焉者即涿泗所  
稱何以尚茲亦嘗觀於世之人乎食焉而非不足  
於田也飲焉而非不足於泉也然其求多取贏交  
固顛冥乎富貴之地履險觸危而不知己者是何



故哉不知吾天之可守焉耳知吾天之可守者飲  
啄豐約未嘗妄有求也惟其分而已矣行止屈伸  
未嘗妄有必也惟其遇而已矣若然者即無田可  
食無泉可飲亦無入而不自得也蘇季子有言曰  
使我有負郭田二頃豈能佩六國相印然世固有  
什百於二頃而能自安於畎畝者寡矣一日一擔  
水用之不盡然如李文饒作相長安必致惠山泉  
至有數千里水適夫人之意欲何限不有以節之  
千駟萬鍾猶漏卮也今大載甫固京華之世胄也  
自弱壯之歲已負籍籍聲於章甫間謂跬步顧眄



可致青雲不幸時命大謬乃至棲遲湖海與田叟  
漁子相伍且其洿邪之入不足以給簞瓢蓬筍之  
構不足以單風雨棲棲浮寄未嘗有終歲計焉顧  
其安而樂之若甚足而無所覲者是何修而然哉  
亦守乎吾天焉而已矣即使異日由屯而亨自訟  
而信離乎菑奮間井而飲食乎公朝太官率是道  
而處之有餘裕矣所謂守吾天而終吾年者惡乎  
不在四吾之稱其義博哉遂為詩四章二十四句  
授李文請以是銘諸屋壁詩曰  
既耕既芸既實  
而獲夫豈無餒自致其力吾食吾田而遠恥辱清



清泠泠挹彼注茲之井之粹氓也蚩蚩吾飲吾泉  
爭之者誰能無已乎能無偽乎受帝之衷曷敢以  
渝吾守吾天維以復初吾食吾田吾飲吾泉吾守  
吾天其氣浩然吾終吾年又何求焉

德水張氏家乘序

昔太史遷著史記自序其家世而班固氏倣之作  
叙傳自是之後文人學士為傳譜碑狀以自述先  
德者不可勝紀夫樂樂其所自生禮不忘其本六  
藝之所載雅頌之所作其義孰有大於是者祖考  
有美實而子孫不述焉是忘其先也即祖考無其



實而子孫飾虛辭以稱之是誣其先也忘與誣雖殊其陷於不孝一也維不肖幸服先人餘訓讀書著文不敢以無能自棄一二年來竊不獲讓時為銘詞以讚述賢士大夫德業夫紀他人之名實而顧忽於其先是悖德之甚也維為是懼第自念不幸蚤失先人孤露而無聞同宗長德凋喪且盡家藏謀譜諸書遭罹喪亂無復存者即欲有所纂錄而文獻不足徵也傷哉傷哉雖然日遠而日忘矣即維不稍論次而後世何述焉謹據先王父所錄叅之見聞罔羅裒集指事紀實著張氏家乘



三篇一曰世譜記世系名字官位生卒妃匹子姓  
丘墓之所在所以舉其概也二曰家傳記出處履  
歷言行以及狀貌動靜雖微不遺所以著其詳也  
三曰外傳閨壺之行別而錄之也譜之闕旁親者  
恐其繁而至於亂也故曰世譜非族譜也傳之自  
執義公始者其上無以得其詳也此家乘之凡例  
也嗚呼我張大族也得姓以來年代遠矣麗之前  
不暇論自國朝來已九世矣計判尹公以下科第  
不過數人位無過三品者子姓無過三人者若此  
不幾於衰矣乎哉然至于先大夫以大魁繼祖



烈顯矣官至八座尊矣不肖昆弟存者四人亦不  
至不繁矣則祖先餘慶殆將自先大夫發乎哉  
君子思其親則敬其身敬其身則進其德進其  
德則神降之福矣詩不云乎永言孝思孝思維則  
又曰神之聽之介爾景福嗚呼可不勉哉可不勉  
哉

西村遺稿後序

右先大夫所著詩五七言摠若干篇為一卷目  
曰西村遺稿西村者先大夫自號也始先大夫  
生六七歲即解屬詞十九為名進士二十二射



策高第文采擅當世然先大夫天資豪爽不喜  
深湛之思自諸生時為科場文字亦不肯斤斤  
繩墨多縱筆立就及仕登朝以政事經濟自表見  
於詞章尤不甚屑意時有製作未嘗蓄草稿而不  
肖維等不幸早孤不得以時收拾放失以故遺稿  
存者乃若是尠也嗚呼痛哉自柳亭公至先大夫  
皆以文章弱齡取大魁名聲翕赫著甚然其祿  
祚皆不稱柳亭公年近下壽而官不踰三品先  
大夫位至六卿顯貴矣而春秋不滿四十說者  
謂才太高名太盛仕太早者皆造物所忌或者其



近是乎若其文詞皆可以大傳矣而其存者乃若  
是寥寥也嗚呼此豈亦天意乎痛哉痛哉先大  
夫於詩未嘗為專家之學然頗喜觀杜牧李尚隱  
故其詩豪麗往往有近似者夫詩固不足以盡先  
大夫之才而今之存者又不足以盡其詩然識  
者覽之亦足以因其微而得其大者且也子孫百  
世羨嚮之慕有所託而無窮矣此今日編集之至  
意也

柳亭遺稿後序

我高祖柳亭公弱冠以文章擢魁科旋選入集



賢賜長暇讀書華聞動一時無何遭已卯之禍廢  
錮近十年既而又忤金安老繫獄幾死累海外者  
三載自是浮沉中外竟未大展以沒平生著述甚  
富其在館閣日月有程課屯否以來數經奇禍又  
久於處間凡得喪悲懽無聊不平輒以發之吟咏  
故詩文之在集錄者止慮千有餘篇先大夫嘗  
從顯庵宋公校定為若干卷繕寫將付剞劂會辛  
卯士禍起先大夫奉缺北塞事遂已不舉繼以  
壬辰兵難奔播跋躓之餘傳家遺墨一無存者而  
是集亦不知落在何地嗚呼痛哉先王父搜尋罔



羅猶不能有所得况如維等晚生孤露日遠而日  
忘者哉自併儼數作世所傳誦者外其餘詩篇不  
能以十數且其所得未必皆公用意之作兼以傳  
錄舛訛故其存者亦非必可傳者然以歛唾之遺  
不可再得謹哀錄為一編目曰柳亭遺稿竊嘗觀  
天之予人以寸蓋欲有以為也即時命大謬世莫  
我用亦必以是傳之後而垂之不朽古之立言者  
皆是也若公英才俊藻獨步當世多士歛枉公卿  
嚮風天之所以畀公似非偶爾然其寸與名反若  
為之崇者道以之窮身以之困既不能大鳴國家



之盛而殘膏賸馥亦不得沾焉後人即有一二可  
傳者嗚呼亦甚寥寥矣既畀之寸而嗇其施又奪  
其傳也造物之不可測有如是夫或曰天之於竒  
寶蓋有時靳闕之故或斲出之而遽收之不欲使  
褻瀆於世也雙龍之劍纔出於土壤忽入於淵泉  
千載之下人無能見其用者亦無不稱其寶者則  
其名之傳于後固不待其質之留于世也斯言也  
誠似闊誕然亦有當於懷者故併錄之簡末

默所稿甲自序

余生七歲始受書十歲誦詩書古文十五通大義



二十始學為古文詞是歲成進士居三年射策決  
科去今已十稔矣自非角礪著寸名仍又早竊科  
第以此頗為流輩所稱許然余寸性實鈍滯非湛  
思不能成章多病體羸不堪刻苦讀書其為文略  
闕古人權度而已不能章摹句擬以故神情雖近  
而步驟多違且觀東土學者寸力偏劣雖名家大  
手筆多有不滿人意者自揣終無當於作者之旨  
因難而生懼因懼而生怠時有述作不復整理近  
以罪屏伏海壖無所用心因為親舊所敦勸稍取  
亂稿刊落荒穢得詞賦韻語古文摭若干篇釐為



四卷目以張氏稿甲續有所得擬以乙丙之次編  
定姑藏之箱簾不敢出以示人仍念余誠不才然  
今年三十有二馬牛羊齒不甚長若為之不已庶  
有少進異日視此不知當作何如狀也蘧伯玉行  
年五十而知四十九年之非日新之效也韓昌黎  
云聰明不及於往時道德日負於初心自勵之詞  
也有昌黎之用心不患無伯玉之成就書此用儆  
奴馬鈍萬曆戊午八月德水張維持國題

谿谷先生集卷之五



谿谷先生集卷之六

序二十三首

送謝 恩兼奏請副使吳肅羽朝京師序

吳侍郎肅羽甫將以貳使朝京師造維而請曰是  
役也不可無子文維曰諾自遼左陷而滄海之路  
通滄海者東海也三韓在東海之東故我國以滄  
海為西海古稱三神山皆在東海秦皇漢武巡遊  
海上彷徨眺望於成山之杲之間若將有遇焉徐  
福盧敖迂恠之士往來惝恍者極其所至要不出  
我國西界外歸墟之壑沃焦之洲若果有之大都



必在此中誠天壤間宏曠闊大之區也羅麗以來  
千有餘年夷夏往來者皆由此焉自燕都定鼎此  
路遂廢歷二百載而復通焉豈亦關於氣數者非  
耶耽羅稱絕遠然乘風一日而至涉登萊者順風  
揚帆不浹旬不止此何減數千萬里維試於靜中  
默想肅羽行色矣高檣如虹大帆如雲凌洪濤撇  
巨浪一瞬千里但見蛟鼉出沒魚龍儵忽天水相  
盪晝夜冥茫而已經過之際有以想田橫義士及  
魯連子管幼安之遺風而安期羨門得仙靈而遊  
汗漫者今果在否則亦足以娛憂暢懷忘履險之



危懼矣捨筏而登岸則登州也登州古嶠夷所謂  
東表絕域乃今厯數千里滄溟而始躡其地斯行  
也可不謂遠乎哉自是而行海岱燕齊之境千有  
餘里而後達于帝京其間山河之雄壯民物之繁  
阜城郭宮室之宏麗禮樂文采之煒煌皆得以覽  
觀而采訪焉於以發舒其膏襟恢廓其聞見開廣  
其知識不啻若出涯涘而觀大海昔人稱司馬子  
長為壯遊以今觀之子長之遊何足稱焉沿洄大  
瀛海之中彷彿領略乎蓬萊方丈之勝者以視登  
會稽窺禹穴不幾於培塿蹄涔乎斯遊也亦可謂



極天下之偉觀矣夫或曰是則然矣獨不念肅羽  
使事之重乎靡監之懷迫於內飲冰之勤形於外  
亦何暇於耳目之觀哉維曰否否肅羽何難於使  
事乎今茲我東彝倫之數叙昏明之廢興天人向  
背之理 聖天子靡不洞燭封號既已錫矣勅諭  
既已頒矣所謂冊命也冕服也特其儀物禮數已  
爾安有許其大而靳於其細舉其實而略於其文  
哉然則是行也猶之決流抑墜何患於竣事之不  
易哉抑維所媮快於肅羽者從王事執玉帛而得  
無乎奇絕壯偉之觀足以償丈夫四方之志為希



有焉耳肅羽曰善是足以送吾行矣

送全州府尹李昌期序

去年秋余失於將息病便血日瀉血可數升許歷  
旬月遂大委頓醫工技窮時昌期按湖西夏秋之  
交亦苦便血其證略與余同上章解職輿疾歸而  
各以病不得相訪訊自是余病益劇涉冬之半幾  
死而幸少愈而昌期亦甚危幾如余先余月餘愈  
然余素羸而昌期亦已衰既失血多榮衛俱損故  
病雖愈而不能起蓋沉淹床篲者閱八九月而昌  
期素著才諳朝廷不欲置之閑地遂拜全州府



尹昌期強起謝恩訖首造余告行余視昌期其黃瘦萎荅猶夫余也余謂曰全大州也為湖南都會昌期病矣能任執乎昌期曰迫於公義與私累未能弁髦是也願吾子之教之也余曰余拙者也身之不能理何知吏事然請誦其所聞夫國猶身也治民何以異於治病試以吾二人之病與所以治其病者觀之則治道可知矣夫病之病也不病於病之日而其未病也固已病矣治之於未病則病固無自而病矣及其病也其為病有本有標分其外內審其緩急梁肉參耆以扶其真元瞑眩砭



石以攻其客邪則治病之理得矣太上未病而治其次治病而得其理病而失治人斯夭闕矣吾輩不能謹之於微故既病而治其愈也遲且難如是可不慎歟全之為州土地之廣民物之殷實甲於湖南其為士者逢掖而誦詩書屋相比也而淑慝相雜其為民者農商錯居而羯羶而不均雕悍而健訟其大豪中猾持吏長短役貧弱斲鄉曲者不可勝數故其難治亦甲於湖南今昌期之治之也果能清源端本正己而率物使不令而從不怒而威是猶未病而治上也明好惡以壹士趨厲法禁



以割豪猾推豈弟以煦疲瘵要使民懷吏畏而士  
知方是猶治病而得理次也若徒屑屑於簿書期  
會規規於米鹽碎細欲以小數御物小惠得民則  
俗吏之能斯為下矣吾輩所以治其病者失得可  
知矣以身而觀國舉一而反三此所望於昌期者  
也昌期嘗宰德山尹平壤牧清州皆劇邑也而無  
不辨治今雖病卧閣而治恢恢乎有餘地矣願余  
有感於治病之理遂書其說以贈行

右丞相玄軒申公六十一歲壽序

今上既定內難即大位悉革除汚穢徵還耆碩



之遯荒者于時玄軒申公起自田間為冢宰大學  
士居無何進拜右丞相越三載為天啓丙寅去公  
始生之歲甲子一周矣公之門下諸大夫士謀所  
以為公壽者德水張維颺言於衆曰世之難於相  
者三寸也度也道也應物成務本乎寸無容大受  
存乎度若乃識超乎榮辱之境心遊乎事為之表  
轉物而不為物轉非幾乎道者不能也魏相之達  
也而涉於尅核王旦之寬也而累於進退唯謝安  
石季長源冲夷昭曠迹寄於軒冕而道存乎丘壑  
雖非至者殆庶幾焉惟我玄軒公弱齡秀發以文



章取大科由館閣至卿宰大為宣廟所眷注其  
材公如杞梓而器公如瑚璉雖阨於謠詠不克盡  
其用然其知公則至矣中經否運百罹鍾於一身  
危於囹圄屏於田畝竄於荒僻身愈困而志愈貞  
道愈亨名愈不可掩四方之士知與不知望公如  
麟鳳以其隱見為治亂之候中興之初首膺簡拔  
以至登庸公之為相也不為大言遽色不喜紛更  
作為因時相宜默運而利道之使人不見蹤跡剛  
而無迹柔而不隨凡事機之微明者未及闕其影  
而公已睹其形聰者未及尋其響而公已聆其聲



蓋公之才如發硎之刃肯繁無所礙如絕塵之駟  
轍跡不可尋如韞櫝之璧照乘之珠藏愈密而價  
愈重也公素持清裁風稜峻截人之期公殆若元  
禮孟博貞不有餘而含弘或歎及觀其所為則虛  
心坦懷順逆無所異人有不相曉者事有不如意  
者或非意相干橫逆交至傍人為之搯腕而公處  
之超然人頗疑公有所勉疆及久絕無纖芥可闕  
然後人乃服公之度也張車騎劉尚書古稱雅量  
然其所遭未必似公之難也即此二者觀之公之  
所以輔一人而宰萬物以臻中興之理者固非



偶然要之皆公之粗迹也公結髮嗜學潛心藝文  
於易之何思何慮詩之無聲無臭深有得焉旁求  
而博綜有契乎柱下玄玄之旨故取以自號焉嘗  
謂萬化本於窈冥百為歸於幻影故功業因於遭  
遇而不足以累吾真也是非生於人我而不足以  
嬰吾中也不以得喪為忻戚不以利害為趨舍唯  
其事無足以為也故遇事而心不礙不期才而才  
達焉物無足與競也故造物而神不動不期度而  
度弘焉此公之所以幾於道而才與度之所由本  
乎談者論國朝名相以黃翼成鄭文翼為稱首



翼成當國家休明昌大之會 世廟以神聖臨乎  
上不下巖廊坐享太平蓋得順風之勢焉文翼身  
遘艱危志業不大展其炳炳表見者惟己卯一節  
耳然皆足為一代宗臣今公樹風操於昏亂之朝  
係安危於鼎革之際兼濟道物質有其文世稱古  
今人不相及未必為確論也公今年始耆矣雖髮  
鬢少變然神明精悍步履如飛視疆壯無減焉  
本朝新經變故庶事草創而 聖上勵精宵旰  
孜孜如其倚毗之切而委任之重孰有踰於公  
者然則止足之訓寵利之戒公宜有所未暇念也



魚水相得上下交修措國勢於磐石奠生民於衽  
席六府三事各得其理而頌聲作然後公之責方  
可以少塞矣夫六十始稱壽自今以往而老而耆  
以至期頤年彌高而德彌邵功彌盛揚聲景鍾與  
國咸休人之所以望公與所以祝公者其不在是  
歟其不在是歟諸大夫士皆曰善請錄是語遺公  
之胤子都尉公以為公舉觴之侑

送清陰朝

京師序

士之行世不能無遇不遇而夷儉之境係焉其忻  
戚趨避故是恒物之大情夫惟君子隨遇而安無



入而不自得此何修而然哉亦達命安義審乎外  
內之分而已夫士讀書砥行立乎人之本朝世之  
污隆人之淑慝上下之相得失吾固不能必也惟  
直道而行致命遂志求盡乎吾之義自外至者吾  
無累焉執此以行天下焉往而非坦塗也以余觀  
於今之世惟清陰公其人哉公高才重名生平  
貞介玉立未嘗少降色辭釋褐二十載安於朝著  
無數年之久其進也不能不寘之於金閨玉署而  
一出則炎荒絕溟關山塞垣無處不至凡否泰消  
長之際公輒為寵辱之首中興以來俊髦奮庸茅



如彙征而公於撥亂密議實嘗與聞 主上固已  
虛襟傾行而明庭之彥想望下風會 朝廷方以  
色荒納污為大度彰善瘴惡激濁揚清之議為世  
所訕然公剛方之操老而彌厲發言斷事動與世  
趨異轍故頗失上下之交至抉摘宵人情態以異  
開寤 上衷其言動直痛切聞者為之縮頸 人  
主既不悅繹於其言而不喜公者謠詠隨之雖素  
號知公者亦或與公相左公自以言不用上書乞  
骸骨歸卧於楊山之石室居久之國家將遣使浮  
海朝京師人皆憚之有司以公克其選公聞 命



即起赴朝東裝行有日矣有識之士相顧咨嗟憫  
公之衰且病而憂海路之不測謂清陰既謝事歸  
矣過海之役獨無他人乎德水張維曰公之行而  
豈徒哉是足以厲士節敦臣道矣公烏可以無行  
自世之衰也士不識去就之義久矣居乎脂韋苟  
合知進而不知退一遇險難則巧避而倖免者溜  
溜也即有不可避能無幾微之見於外者鮮矣若  
我清陰公立朝則盡言不諱手批龍鱗言不用則  
奉身而退若將終身及其受命而奉使也雖涉  
萬里之遠乘渤澥之險適然無難色焉豈非真知



輕重進退無所苟者耶君子守義故不撓安命故  
無憂存乎內者固則外物無足以變焉公故饒為  
之矣詩不云乎愷悌君子神所勞矣先正文忠公  
之朝天也後時而發先期而至若有物相之者正  
直之道協于神明理固宜爾陽侯海若無其神則  
已若有之其能為國家護直臣也必矣長風破浪  
一瞬千里登州短亭之詠其已乖矣夫若乃將命  
之敏專對之寸公之餘事也維故不復為公道焉

湖堂契屏序

國朝用右文致治所以儲養詞臣甚備然其簡選



之重禮遇之隆與夫功令之嚴至湖堂而極已以  
加矣非有雕龍吐鳳之譽即臺省清要館閣雅望  
無以廁乎是選 賜暇之後廩給優異太官之珍  
小府之藏天閑上乘玉珂雕鞍之錫翩翩相踵也  
既月日有程課而或中使齋黃封奉 御題不時  
而至宣勸未終立責報章才非七步徃徃不免窘  
躓其榮則至矣顧其責重而其任實難也譚者以  
登瀛擬其選必仙才與仙分具然後可以處此而  
無愧也壬辰之變廢而莫舉 宣廟季年去蕪甫  
爾未遑文物光海初稍稍修舉之無何時事大變



故學士多羅文罔而羣壬之私人不辨伏臘者紛然竊據利其帑稟以為醉飽狎謔費醜已甚矣今上即大位悉糞除舊汚屬庶事並創而猶注念文學乃命復舉堂選于時懷瑾握瑜之士起自屏螯筮于明庭蓋斌斌質有其文大學士提衡而掄拔之得十人皆極一時之望獨不佞維以無能濫吹馬會以兵荒殺禮姑輟賜暇而恩賚之及視具僚有加焉維謂自升平故事觀之茲選雖重特豐亨藻飾之一事疑若無甚異者以今日艱虞凋瘵至不能備四簋之養以給長暇而猶不廢其選



存其名將以責其實也。朝家加意斯文而期望於吾儕不已，勤且至乎方今羣才奮庸博雅鴻碩，所在林立而膺斯簡者僅滿什焉。吾儕何以得此而亦何能堪此哉！夫上之所以期望於我者若彼，其勤且至而身所叨竊隆重又如此。吾儕思所以稱塞萬一將若何而可精白一心修辭居業，任與學不相悖，明體適用以應時須，庶幾無負乎溉根食實之望。此吾儕所當自致也可不勉哉！居久之，諸公相與謀曰：是舉也為中興盛事，不可以無志且也。離合升沉亦人事之不可常者，盍圖所



以繫情而留跡者遂命工作屏施以繪事列紀諸  
人名氏既成屬維序之噫自癸亥至于今纔四閱  
歲矣於向十人者維與飛卿肅羽皆以陞遷離局  
而踈庵之良既為秋柏之實矣古人所謂俛仰陳  
迹者居然可見此圖之所以作而文亦不可以已  
者也嗚呼可勝慨哉

白沙先生集序

天之為世道慮也至矣平陂往復世變之不能無  
者蓋繫於氣數天亦無能如之何也然其變之將  
至也天必為生英人偉士畀以其責使或成其事



功或樹其風烈而斯世斯道終有賴焉若夫人者  
其生也實得天地之間氣卓然不隨存沒而顯晦  
欬唾笑談之遺皆可為後世重古之人遠矣求之  
近代故相白沙李公其庶幾乎國家自壬辰來遭  
大變者三焉倭寇之難國之不止僅如一髮而公  
首建大策請援於天朝既而長本兵賫睿謨  
奔奏先後克成中興之業丁應泰之誣我也禍機  
之烈劇於壬辰即天鑑一眩事有不忍言者廷  
臣失氣踳蹙莫肯前當其鋒焰而公單車嚙命  
赴羗帝庭使國誣洞雪而主憂以釋則其功益



偉矣閱世而違人倫之變奸臣逢惡請廢君母  
金墉之禍迫在斯夕人之所以為人者一朝墜地  
盡矣方且陳刀鋸列鼎鑊盛氣以胥言者而公明  
目張膽吐片辭以定父子君臣之義竟坐此竄絕  
塞以浚然賴公一言長秋咫尺地卒不得以不測  
加焉則其所撐拄之而扶持之者殆有不可以言  
盡者雖謂之磊磊軒天地可也 本朝昇平二百  
年不幸當公之世三遘大變而三立奇節 社稷  
靈長彛倫再叙苟非天之所生而有得於間氣者  
其孰能與於此哉公才甚高學甚博為文章有奇



氣藻思涌溢踔厲不羈其至者去古人不遠而不  
至者亦非今人所能及顧公於此不甚屑意所著  
述往往棄稿不收故存者不能多噫亦何待於多  
哉叔孫豹論不朽立言最後焉文章又立言之靡  
者公之所樹立自足以照耀千秋區區文詞之傳  
否不足為公輕重然自慕公之風者謀之即陳蹤  
末迹皆欲其流傳永久况於精神之所運言語之  
所發者乎公之沒已一紀家集尚未行會李公顯  
英按關東與江陵李使君命俊皆故公客也慨然  
合筵彙公遺稿付剞劂而公諸子屬維引之維不



東坡先生集卷之六  
三  
六  
佞弱冠以里中子獲及公門蒙國士之遇今而飾  
其固陋之辭以相茲役義不敢辭故略述公生平  
以見天之生公有不偶然者嗚呼不如是文章雖  
美何足以傳於遠後之覽者其亦知所本之哉

玄軒先生集序

維少從載籍中歷觀古之名人巨公處宰輔之地  
功名著於春秋若唐之房杜姚宋宋之韓富呂范  
詎不卓犖閎偉哉其詞華文采僅足以自見於  
一時而已唯張曲江陸敬輿歐陽司馬諸公身都  
廊廟佩天下蒼生之望而文章之美燁赫藝苑蓋



歷百代而僅有若而人何其寥寥也天之降才實  
難或命以經濟或畀以文詞其能兼有而盡美者  
蓋益難矣我東文學不如中夏固也然其能者往  
往多出於顯位若麗之李文順益齋牧隱及我  
朝之高靈德水商嶺五六公皆幹鼎軸資辨章而  
兼主詞壇之盟殘膏賸馥沾丐至今雖其偏全雅  
俗各有可議要之皆庶幾不朽哉作人之效莫盛  
於宣廟而故相玄軒申公出焉公生稟絕異之  
才甫成童博綜墳典弱冠釋褐歷敷華臚為薦紳  
領袖中遘否運厄於縲紲囚於田里悴於江潭而



文章益成德譽益尊晚際中興首膺寵擢握文  
衡掌統均以至大拜經而有甲子丁卯之變公彌  
綸盡瘁上贊睿謨下收羣策卒能夷兇弭難再  
奠國步則公雖不自尸其功而譚相業者指故無  
得先公屈也公於文詞蓋得之天授其在朝時著  
述甚富而頗放失自癸丑來居困處約者踰十稔  
遂專精覃思上下千古蔚然成一家言其為詩不  
主一格大抵出於唐人而雜取中晚以及盛宋諸  
子舉皆割滌而攘瑜焉唯古樂府自隆古漢魏以  
至隋唐無不擬議徃徃有酷肖者亡論羅麗所未



有即前代名家多所未遑而公為之綽然有餘地  
古文詞邁逸俊發光芒絢爛時或步驟 皇明諸  
大家殆欲與之角壯而爭驅內外篇或譚道妙或  
析世務多精詣獨到之見至先天窺管一編蓋入  
邵氏之門而闕其突奧非可以文字論也夫功言  
之不能兼樹也詩文之不能兩至也自古昔以然  
而公身生衰季種學居業卓然有立名理為士林  
之標準位望繫國家之安危而詩聲文軌各擅詞  
場邃識微言直探理窟往詰之所未全公則備焉  
諸家之所偏造公則兼焉若公非所謂全才大雅



高視百代者耶公沒既葬胤子東陽公合公諸稿  
六十三卷而鋟行之命維為之序維少而顛蒙公  
以先人之故辱進而教之得於薰染者多矣公之  
在謫維嘗為公記旅菴及公既耆維又為文以壽  
公其於公之生平自謂粗得梗槩今而序公之集  
不敢以不文辭九原可作無亦有以當公意否噫

雲谷詩稿序

自余在朝時聞南方有詩僧微公徃徃傳筒寄聲  
垠無因博采其什今年秋貶官錦城至州之月餘  
完山韻釋懷玉自大笔來訪袖出雲谷詩一編雲



谷乃徽公號也閱之多與諸巨公酬唱詩調清刻  
頗有唐人風致余觀釋門能詩者以湯休寶月為  
稱首其後自唐至五季有皎然靈澈九僧之流宋  
有道潛聰殊輩與坡公遊遂以名世然其能盡脫  
蔬筍氣者蓋鮮矣我東前代多詩僧近頗寥落西  
山松雲時有遊戲不盡合作若雲谷者殆不易得  
良可賞也竺典以綺語為口業然世之縛戒律耽  
空見者未必皆真得也謝康樂有言曰得道須慧  
業文人况詩可以觀有陶冶性靈之妙明心之士  
又惡可薄詩為哉余欲刪次是卷為可傳於後者



病未暇也姑叙而付諸懷玉歸之崇禎己巳孟冬  
谿谷張持國書于錦城郡齋

高峯先生集序

天之將興斯文也必生鴻儒碩賢俾作宗主又有  
卓犖闕通之士出而為之補佐以羽翼斯道而使  
之明且行焉自孔孟沒千有餘載而得程朱絕學  
復明當程子之時有若邵張二子為之友游揚諸  
公為之弟子當朱子之時有若南軒東萊為之友  
而蔡季通黃直卿之徒為之弟子故聖如夫子而  
起助之益猶有望於門人顏淵之天至有天喪之



慟相頌之義可謂殷矣我東道學莫盛於退陶及  
門之士傑然為聞人者甚衆而高峯竒先生為之  
冠先生生稟卓絕之才博聞力學於書無所不觀  
初從河西金先生游年三十二歲始拜退陶自執  
弟子禮而退陶恒遜師席每遇微言邃旨輒以叩  
之先生而他門人莫得與焉 宣廟嘗延問退陶  
今世孰為學問人退陶獨舉先生以對稱以通儒  
其見重如此其與退陶論四端七情下筆數千萬  
言明暢辨博識者服其精確先生拜退陶之歲始  
釋褐登朝士類望之若麟鳳然每朝廷有大議論



必待先生片言而後決先生資性英特氣勁言厲  
初許李樛幾跲而復起及在 經幄勸講明切動  
以堯舜三代責難於 上當 明宣之際極陳已  
卯乙巳始末開悟 上心卒伸公議至於德興典  
禮及 原廟儀節辭義嚴正力破邪說卒使不至  
累 聖德者多先生之力云先生晚節有不樂處  
朝者謝病南歸居三歲而卒春秋僅四十六先生  
之道既不大行於世又不幸無年未及有所論著  
然攷其淵源所自則退陶之門學者雖盛治未有  
先先生兩堂室者若先生其亦天之所命而得與



於斯文者乎先生於文章不事雕飾而氣力宏厚  
波瀾老成蔚然成一家言一時宗上哲匠歛衽推  
服皆自以為不可望先生易簣踰五紀而文集尚  
未刊行中經喪亂散逸頗多學者恨之今年春趙  
使君纘韓守善山始謀鋟梓而屬序於維維以文  
陋辭無心維出牧錦城先生之墓實在敵境竊懷  
高山景行之感會趙使君千里走使申前請甚懇  
維既有隱感於衷又重趙使君之請遂粗叙崖略  
以俟篤論君子之折衷焉崇禎二年歲在己巳仲  
冬之吉日後學德水張維謹序



送平安道巡察使閔士尚序

方今論西事者孰不以待島為至難哉然其難也  
非兵之不足用之難也食之不能給之難也  
命予奪之未可知之難也虜情離人之不可測之  
難也其為難在將相之不調而廟謨之無所定也  
則任西事者雖欲有所猷為安所取裁先事而未  
有定筭債事而無所逃責今之任西事者不亦難  
乎自島難之始發也或曰可擊或曰不可擊或曰  
須請命于閣部也然而可擊者之說竟行焉及其  
即島而無所得也或曰可罷或曰不可罷或曰當



勦空島然而可罷者之說竟行焉豈事機變而廟  
謨隨而詘信哉今之勢又與昔異我之軍實驟困  
於輕舉而彼衆志已定兵力已完其覘我之深淺  
而易我也必甚矣顧彼方患乏食故不能無匿其  
舊忿姑好辭以請糴好辭而不足則恐喝隨之恐  
喝而不足則劫掠經之劫掠而不足則其勢將靡  
所不至廟堂之上握籌而畫者猶執而不化始曰  
可擊者今而曰速與絕也始曰不可擊者今而曰  
姑與濟也夫業已不能擊解兵而通使則濟固不  
可已也然力必不能厭其欲而釁必至於不相容



則濟之說終有窮也絕之必促其變促其變而無  
備以待之一日之難足以危我壇場絕亦何可輕  
議乎濟焉而不慮其終絕焉而不圖其備為藩臣  
者欲從濟乎則格於主絕者之議欲從絕乎則許  
於主濟者之意茫然不知所適從事去之後主濟  
主絕者未必當其責而為藩臣者反被刀筆之議  
今之任西事者可不謂難乎故嘗試論之今之待  
島也濟亦難絕亦難濟亦必有變絕亦必有變亦  
曰早為備而已矣今國家既許萬金之糴固已不  
能無濟之矣過此而無厭焉其終可盡應之乎極



而至於劫掠其終可盡任之乎故曰莫如備之夫  
薩南則差有備矣然未足以應大變也必厚集焉  
而後可恃也薩北則蕩然空虛遺民之保其鄉土  
者剝削於流漢且盡矣若變有甚於此者是舉而  
糜之虎吻也其可忍乎况薩北既失則薩南無障  
蔽而關以西皆不可保矣為今計者莫若戍薩北  
擇宣定要害之地宿數千精卒依其岩阻輯其流  
民陰察非常而徹備之與薩南城鎮聯絡聲勢彼  
於糴額之外有所誅求一切勿許流漢之害吾民  
者稍稍以兵勢禁之靜而足以衛民動而足以威



敵則彼雖狼戾不敢妄動關西一方隱然有所恃  
薩北之地得為國家有矣夫然則濟亦得絕亦得  
雖不幸而有變不至於無可制矣此非難為顧無  
能建請者耳士尚之受此任人無不稱旨知士尚  
之才足以辦也而士尚之策西事適與愚所云者  
不約而合然其事之難不在於士尚之不能為而  
在於用士尚者之未有定也噫天下何嘗無才亦  
何嘗無策顧能用之為難耳士尚之可為者士尚  
必能自盡言焉而不見聽畫焉而不見用是國家  
無意於濟難而大棄西土也必不其然士尚勉之



北窓古玉兩先生詩集序

仲尼論逸民上下數百千載所舉者只七人何其  
鮮也夫夷齊之清殆入聖域下焉者亦必中清中  
權則列於斯選者宜若是難也自茲以降漢有嚴  
遵魏有孫登唐有孫思邈張志和此其人雖抗迹  
象外不可槩諸聖軌然其飛遯高蹈不獲世之滋  
垢且有微妙玄通之識非局儒曲士所能闕方之  
逸民抑其次也以余觀於近代若北窓鄭先生暨  
其季古玉迹其所造奚遠不若古之人哉北窓生  
而靈異博通三教其修攝似道解悟類禪而倫常



行誼一本吾儒以至方技衆藝各臻奧妙然皆非  
學而得也少時隨親覲上國過鴨水見華人便作  
華人語入燕遇外國使便作外國語嘗入山攝心  
數日而盡知山下百里間事如目擊焉吁亦異矣  
不幸遭家變無意世事暗室默坐者幾十年年四  
十餘而後識者以為解化噫使先生生而及聖人  
之門竭寸於誠明之學即孔氏所稱何以加焉古  
玉少北窓二十七歲其寸識不及伯氏遠甚而清  
夷冲澹類有道者喜吟詩草隸亦工旁通方藥風  
鑑之術往往多奇驗坐家累身與世交相棄遂託



於麴蘖以迓焉然公少從伯氏及守庵朴枝華學  
通金冊秘要中歲喪偶不復娶斷慾三十餘年以  
老壽終人稱爲酒仙焉北窓有遺稿業已編入於  
所謂三賢珠玉者而古玉詩經亂放失存者僅數  
百篇軍威蔡宰亨後古玉之彌甥也將合刻兩先  
生稿而問序於維維謂古之畸人逸士埋光匿輝  
不欲人之知之然其聲施後世不能無待於言之  
傳也君平解老思邈纂方蘇門數語西塞一詠之  
數君子者故無所待此然不有是後之人何觀焉  
北窓不治詩多信筆直寫要以暢其意而止古玉



頗治詩聲調清遠時有唐人風致要之兩先生非  
待詩而傳者而詩之出於兩先生者自不可以不  
之傳也北窓諱礪字士潔古玉諱磻字君敬其先  
溫陽人云

沙溪先生經書疑問後序

學者所服習五經四子也五經四子之旨微矣先  
賢傳註雖詳間有簡奧難曉者後儒之發明其義  
不勝其多而精粗深淺言人人殊故讀書者於經  
傳本旨不能無未達者於後儒解義未免有致疑  
者不有以闡繹而會通之後學何改焉此沙溪先



生經書疑問之所以著也先生弱齡志學既後粟  
谷先生聞大義又遍交一時名儒講劇研究平生  
未嘗一日去書至白首不懈讀而思思而有疑輒  
隨手劄錄自小學四子以至五經皆有所論辨會  
萃成帙凡若干卷一經講問者雖門人後生之說  
亦不遺焉既屬繼使志諸末簡夫學問思辨篤行  
之與衛也世之學者誰不讀書鮮有能知疑者此  
無它學而不能思也思而後有疑有疑而後有問  
辨問辨有得而後推之於行此古之所謂切問近  
思先生有焉覽此編者誠能以先生之心為心精



思孰講期於有得焉其亦庶乎善學矣吾黨之士  
盍共勉焉

送吳肅羽出牧驪州序

尊卑而榮辱之外內而輕重之仕宦者之常情也  
然君子之仕也為義不為利尊而不能舉其職不  
如卑之為安也內而不能行其志不如外之為慊  
也古之君子立乎人之本朝其用心蓋如是也世  
之所重者莫如將相其次臺省館閣然余觀於朝  
為將相者其能有尊主庇民安邊制敵者乎為臺  
省館閣者其能有謹言正色繩愆糾繆者乎若是



而謂之舉其職行其志吾未信也嘗思而得其故  
此非其人之皆不材也勢不便也非其勢之不便  
於今日也蓋其來也久矣院於時格於勢雖有其  
人亦將如之何哉若夫外職則異於是雖一州一  
縣之小其四封之內令焉而無不行也惠焉而無  
不究也有一利可時而興也有一害可時而去也  
即有事出於上非吾所能奈何然其方便斡旋未  
嘗不在於我其行志舉職視處內者萬萬不侔焉  
此無他彼近君而勢分此近民而勢專故也吳公  
肅羽早以才敏稱嘗歷踐華廳出按閩東節以憂



去服闋而入銀臺侍 帷幄無何乞外得驪興驪  
小州也肅羽以近侍出議者咸以為不宜肅羽獨  
欣然意得也知肅羽者或云肅羽有親在堂驪雖  
小地近便於逆養且其處僻事簡有江山樓閣之  
勝理民之暇可以讀書探勝以自適也此肅羽之  
所喜也余謂是固可喜然肅羽之志未必獨為是  
也彼其曾中之才恒勃勃自竒世人之所榮艷心  
有所不屑欲得民人社稷之地以小試其政事而  
惠澤元元為他日經濟之基本此其志遠矣世之  
人何足以知之會肅羽將行問言於余遂以是為



贈

簡易堂集序

譚文者動以辭達為口實辭達故是聖人語獨不  
曰言之不文行而不遠乎夫辭至於達可謂有其  
質矣即無其文何以綽綽乎君子而能垂諸不朽  
哉韓子之言唯陳言之務去古來為文者何限唯  
不為陳言者乃能鳴於後世國朝文章盛矣唯  
佔畢垂崖四佳虛白三四公稱大家數虛白四佳  
通敏利用館閣之豪垂崖博而寡法佔畢精而未  
大以視曩朝牧老諸公猶之乎東西京焉儻所謂



文以代降者有以局之耶上下數百載僅有若而  
人然不能無可議者斯文其可易言哉右文之化  
極隆於宣廟文藝之士蔚然羣起而簡易崔公  
為稱首公天才絕人結髮操觚即為古文詞弱冠  
擢壯元名聲大振於書酷嗜班韓晚而好歐陽子  
其為文刻意湛思一句字皆繩墨古作者草稿不  
三四易不出也意過深而寧晦毋或淺語過奇而  
寧澁毋或凡每一篇出人皆傳誦雖狃於陳言者  
讀或不能句然亦不敢訾警曰此非今人語也詩  
律亦矯健有致得黃陳句法公既負絕藝願院於



時官不大顯嘗提調承文院管事大文字 皇朝  
贊畫劉黃裳文章士也見公所撰薰盥而後乃讀  
贊美不容口議者謂公之文氣詘於垂崖而法勝  
之理遜於佔畢而辭過之截長續短殆可以鼎立  
餘數公者辭達可耳文而行遠不能不屬之公也  
公嘗手定詩文為若干卷公沒而子姓零替不能  
傳其業在朝諸公慨然謀曰使斯文湮沒足為千  
古恨矣遂鳩財鋟梓以求其傳謂維雖未及識公  
粗知慕公文者俾為之序嗟乎公之在世也祿位  
不足以動人沒後數十年遺編爛葉乃為諸公所



表章身之窮通文之顯晦乃若是相左孰使之然  
哉立言之士不遇於世者觀此可以無恨矣公名  
豈字立之深於易學有本義口訣附說二卷傳於  
學者其文章蓋不為無本云

送東岳李公觀察嶺北序

我東八路兩界稱重地兩界者關之西嶺之北也  
關西接壤中國又與建夷為鄰而嶺北則西自三  
甲東盡海皆與靺鞨限衣帶水藩胡雜處六鎮城  
塹之外帳落相望異時建夷解辨 皇靈遠震關  
西守臣唯以應接華人為重務壇圉之事非所憂



也嶺北內以撫御藩種外以隄防勁虜一有失宜則赤子化為龍蛇犬羊指然反噬如先朝癸未之變特小醜梗化耳猶足以震撓四方故昔之論劇易者謂北重於西自奴酋作逆日眈眈視我及丁卯之難兩西千里之地蕩為虛莽生靈之脫鋒鏑者十不能二三其喪敗酷矣以至于今虜唱曰至壇場之虞莫保朝夕而向之為北憂者如忽刺諸部今皆已亡矣則西事之殷比北不啻倍蓰矣然余嘗聞識者之論治亂相承否泰迭運故或因敗而為福自安而得危往者西北均重而西易而



北難今也西茶於兵而北差完也以理推之天其  
或者悔禍於西而虜亦知創殘之甚必怠於窺覷  
矣此鄙遠於王化狃於無事將吏貪虐兵民愁  
苦邊鎮守禦之備蕩然空虛虜因開市覘我也悉  
矣其能無朶頤於畜牧之饒乎一朝有事磨天以  
北非吾有也故曰今之憂不在西而在北也今年  
嶺北缺方伯朝議難其選廟堂舉東岳李公由小  
秋官往踐其任人謂李公方以文章負重名詞館  
藝苑虛位以須即謀猷剴割固無適而不可然舍  
館閣而用之藩垣則無亦枉其才也耶余曰否否



國家今日之憂無如西北而北尤重一方之治亂  
而舉國之安危係焉今之用才孰有重於是者李  
公少有遠志釋褐即佐北帥幕出入塞垣周旋於  
老校退卒之間其知塞上利病熟矣中年出守端  
州端為北路劇地又稱利窟而李公以廉能著異  
績至今北人慕之猶并土之於郭細侯夫當殷憂  
之日莅寄惠之地奠安壇場仁之為福星壯之為  
長城使 聖主無復北顧憂者此真公之能事也  
彼區區內外一出入之間何足為公論寵辱哉世  
常譽文人實實用而為文人者亦沾沾自喜以事



功為無足為通方之士豈應爾也詩不云乎左之  
左之君子宜之右之右之君子有之又曰文武吉  
甫萬邦為憲余請以是勉李公因以為贈行之言

八谷集序

嘗謂秦漢以上無文人亦無詞學無文人也而時  
之大夫士靡不文也無詞學也而人各指事陳詞  
靡不工也自魏晉以降始有以文詞自名者組織  
以為巧采色以為華浮淫纖靡日趨於下蓋古之  
人敦本尚實以得於中者發而為文非後世之所  
能及也我東文章何敢望中華然汗隆之機亦自



略同在昔盛時士之攻文者舉皆本源經術以理  
趣為主故其為文類多平實易直詞不足而意有  
餘自數十年來學者厭常喜新多為竒衰僻異之  
習華日以勝實日以凋驟聽其言真若可以軼唐  
宋而上之徐而察之扼蠟之色澤耳文之敝也極  
矣乃今得八谷集而寓目焉信乎其有先進之風  
流乎八谷者故資成具文懿公之跡也公少負盛  
名博學通經術於文章寡許可雖宗工才子之作  
鮮有當其意者然未嘗形諸黃居乎唯靜坐讀  
書溫繹經義不肯以詞翰自任而詩文和暢該贍



詞理均稱蓋得之本實非絺章繡句者所可擬議也胤子綾海君宓手編為七卷未及梓行季子今大司寇宏統制湖嶺遂就元稿刪成四卷而剗削焉既成屬維序之維先大人與綾海公文誼甚篤於公實有拜床之分而不佞維亦獲習於司寇公感念先故義不可辭仍念文章之作豈惟關於情性即福祿衰盛亦可因以占測彼寒苦之士搢擢胃腎日鍛月鍊畢精句字之間工則有之要之非達器也若公所著寬平敦厚有君子長者之氣象宜其沒世之後餘慶濬發自家而國光啓無疆



之休美也然則是集之行夫豈與曲藝一技之士  
爭能於詞苑已乎治世之音鉤鏗悠久殆無窮已  
矣嗚呼盛哉

松江遺稿後序

右松江遺稿古今詩雜文摠若干篇分為幾卷季  
子舍人君所手編而玄軒申相公為之序舍人君  
以授維維受而讀而歎曰嗚呼余觀於是竊感否  
泰消長之變也始公布衣時已有盛名其釋褐當  
明廟季年思治之際歷踐臺省直聲重一時乃  
宣廟初元羣賢勵翼廩廩向至治而公與高峯栗



谷諸先生道同志合接武彙征為清議所宗既而  
時事稍變朝著多釁諸公憂之或欲以調停之說  
消弭之而公獨持風裁激揚無少改以是雖知公  
者猶不能無以弦韋之乖而微病公仇嫉之徒論  
訛四起公遂不安於朝己丑之變宣廟知公忠  
蓋引以自輔旋為巧讒所中而辛卯駭機發矣公  
為鉤黨之首梃棘絕塞禍且不測壬辰難作天  
心悔悟召公還尋出南服視師無何而公下世矣  
公既沒而齟齬者益甚竟追奪官封子姓被錮知  
舊坐累者幾三十年至今上踐阼黨禁始解既



復公官爵諸子皆躋通顯嗚呼豈所謂天之勝人者歟計公始登朝去今已歷三世其間升沉黜信凡幾變而世道之汙隆亦可見矣易言否泰天數也然其機實係於君子小人之消長不其然歟嗚呼可慨也已公天資高邁輔以師友淵源孝悌之行廉白之節剛介之操卓犖絕世文章特餘事耳為詩未嘗刻意鍊琢多出於對境揮洒徃徃雋爽飛動有聲外之韻意外之趣故譚執者琮之以為必可傳焉舍人君命維曰剖劂氏將奏功矣子盍有述噫稱公而凡可言者玄軒序備矣維何敢贅



只道其所感於中者綴語卷末

石洲集序

詩天機也鳴於聲華於色澤清濁雅俗出乎自然  
聲與色可為也天機之妙不可為也如以聲色而  
已矣顛冥之徒可以假彭澤之韻齷齪之夫可以  
效青蓮之語肖之則優擬之則僭夫何故無其真  
故也真者何非天機之謂乎世之人以詩觀詩不  
以人觀詩若然者豈唯不得其人并與其詩而失  
之詩可易言乎哉石洲之詩談者謂百年來所未  
有此固以詩論也乃余實得其人焉余生後公幾



二十年弱冠幸得從公游為人廣顙哆口踈眉目  
貌偉而氣豪言論磊落動人間雜詼譎性酷嗜酒  
酒後語益放傲睨吟嘯風神散朗即不待操紙落  
筆而凡形於口吻動於眉睫無非詩也者及其章  
成也情境妥適律呂諧協蓋無往而非天機之流  
動也公雖以詩酒自放然天資甚高內行甚飭讀  
濂洛諸書見解通明雖老師宿儒無以遠過之  
宣廟聞其名命進所為詩大加稱賞至以布衣佐  
儉使光海政亂屢以危言忤權貴竟中蜚語坐詩  
案以死及今上踐阼命贈某官以伸直道湖



南方伯沈公器遠完山尹洪公寶皆公門下士始  
鋟公遺稿刻成屬余序之余結髮知慕公嘗得一  
言獎許至今未敢忘也序卷之託又何可辭噫公  
以豪傑之資用志不分專發之於詩然其過於世  
也只一當華使而已竒禍之懣竟亦繇是致焉不  
知天之畀公絕藝榮之歟抑禍之歟乃今遺集之  
行出於禍釁之餘殘膏賸馥將沾被寰中其視富  
貴而名磨滅者得失何如哉逝者而有知亦足以  
自慰矣悲夫

重刻杜詩諺解序



詩須心會何事箋解解猶無所事况譯之以方言  
乎自達識論之是固然矣為學者謀之心有所未  
會烏可無解解有所未暢譯亦何可已也此杜詩  
諺解之所以有功於詩家也詩至杜少陵古今之  
能事畢矣庀材也極其博用意也極其深造語也  
極其變古人謂胷中無國子監不可看杜詩詎不  
信歟註解者稱千家謂其多也至其密義粵語鮮  
有發明讀者病之久矣成化年間 成廟命玉堂  
詞臣叅訂諸註以諺語譯其義凡舊說之所未達  
一覽曉然梅溪曹學士偉奉教序之然其印本之



行於世者甚鮮記余少時嘗從人一倩讀之既而  
欲再觀而終不可得常以為恨今年天坡吳公翮  
按節嶺南購得一本繕寫校定分刊於列邑而大  
丘府使金侯尚宓實相其役既成走書屬序於余  
嗚呼比興之義謂無與於斯文詩直可廢也詩有  
未可廢者則杜詩何可不讀讀杜而有諺解其不  
猶迷塗之指南乎况是編也 成廟所嘗留神以  
嘉惠後學者也重刊而廣布使學詩者戶箴而人  
誦之以裨 聖朝溫柔敦厚之教此誠觀民風者  
所宜先也吳公嗜學工文詞又敏於吏職乃能於



蕃宣鞅掌之餘加意斯文百年垂廢之書煥然復  
新甚盛舉也余既重吳公之請又自喜及其未老  
將復睹舊所欲觀而未得者遂不辭為之序

### 芝川集序

維少也頗聞藝苑餘論其稱近代名家詩必曰湖  
蘇芝湖謂湖陰鄭公蘇謂蘇齋盧公而芝川者長  
溪黃公誦也及長獲睹三家詩湖之組織精緻蘇  
之氣格雄拔篇什之富蔚然為大集而芝川稿近  
體未滿二百首古選歌行絕無傳焉何其寥落也  
然讀之橫逸竒偉名章雋句磊磊驚人即其獨造



之境真可與二家相角子美所謂賦詩何必多者  
不其然歟公以高才邃學早擅大名中年頗與世  
塗抹掇晚被 宣廟知眷奉奏 帝庭快雪 璿  
系百年之誣遂策元勳進爵極品提衡文柄為一  
代詞林宗匠壬辰之變酷遘奇禍仍為脩郤者所  
甘心以危法文致之奪爵遷謫抱枉未伸而沒生  
平著述放軼殆盡胤子承旨公哀集成編藏之巾  
衍世無別本及壬子之獄承旨公遭誣被逮家藏  
文籍悉搜入禁中隻字片紙無復存者久之中貴  
人從內裏得故紙數束以畀人將克糊塗之用之



川稿適在其中或有識公名者偶見而認之以告  
公之壻李判官郁遂用重價得以錄之至 今上  
當宁既命復公官封而外孫李厚源即判官之子  
也為丹陽守取公遺稿授剞劂而以行狀及諸公  
所為公文若詩者附刻焉既成請弁卷之文維謂  
文章大業也其得之也既不易其傳之也亦不偶  
若是集者有必不可泯之實遭必不得全之變既  
失而幸得之將晦而竟顯焉殆若有物陰相之者  
吁亦異哉公於文存稿尤鈔然都堂一書筆力縱  
橫一鬻足以識全鼎滌指者當自知之是為序



送東岳李公泛海如京師序

每至險也涉海至危也犯至險而終至危人情之  
至不願也無不可已而樂出乎人之所不願非情  
也有不可已而憚其難而避焉非義也二者均之  
為悖道自遼路阻梗東藩職貢之使皆繇滄海以  
行每行使价而下譯胥軍吏以至廝役亡慮數十  
入人情不相遠也然譯胥軍吏以得行為幸爭先  
而競進若不得則以為大戚為使价者齎咨涕洟  
六親相吊此其故何哉譯胥軍吏利其貨為行之  
可以致貨也而趨焉為使价者私其身為行之或



危其身也而避焉利其貨固利也私其身亦利也  
如其喻於義也貨固無足道者身亦有所不顧也  
當行而行當止而止不以利害而忻戚不以夷險  
而趨避君子之操不當如是耶譯晉軍吏小人也  
知有利而不知有義其沒於貨固也為使价者非  
所謂君子乎乃不知義而唯使其身圖卒之與譯  
晉軍吏同其汙也不亦異乎以余所睹記前之奉  
使者唯清陰金公暨閔公士尚鄭公紫元當行而  
無難色坦然若就康莊余嘗壯其人而心敬之此  
外豈無其人哉顧余矚之未悉耳乃今得東岳李



公焉李公前歲承命出按嶺北節驅馳往返於  
關塞數千里之外既得代而未還有司以公充  
奏請副使人謂李公年踰耆矣又耽酒多疾乃於  
經年鞅掌之餘而授是任無論朝家體下均勞之  
道有不應爾者即李公若以衰憊不勝任辭將何  
辭以強遣之及李公至色益腴氣益舒飭裝戒行  
而稱曰此王事也我衰矣而不甚羸倦矣而不  
至執我而不行誰當行者聞者偉之以告余曰李  
公於是乎賢於人遠矣余謂使恒人而有此可謂  
難矣在李公未足為賢也夫李公以文章行義重



於世釋褐三十餘年歷職外內事不辭難亦無所  
不辦治設令真履大難猶不肯苟免况奉 君之  
命而朝 上國乎於此而有幾微之見即稍知自  
好者有所不為而况李公乎若乃涉海之險則有  
說焉易言利涉大川必以利貞為戒唯正為能行  
險故也今天使臣之過海也舟楫之必飭風候之  
必戒允人事之可致者宜無所不盡其有幸不幸  
者係乎天耳忠信之心正直之道可以感異類可  
以協神明若是而有不獲祐於冥冥者吾不信也  
詩不云乎愷悌君子神所勞矣審爾則公又何憂



於涉險哉若夫使事之殷專對之能此誠李公所  
宜自盡者無俟余覩縷故不道焉

梧陰集序

功與言均稱為不朽而能無焉者鮮矣小家子矣  
毫墨搢擢胃腎斲以一藝名者固不足與議於事  
業之實乃若身都將相功名燁赫一世徃徃或有  
推少文如漢庭大臣者終不免富貴磨滅之刺操  
觚之徒鼓吻而議其後亦可恨也夫唯豪傑之士  
全才淹識獨稟間氣華實兼備左右具宜施諸事  
則為勲業鼓之言則為詞藻旂常之績緗素之業



齊傳而並耀求之公古蓋希觀焉若故相梧陰尹  
公其殆庶幾乎公少用高科進歷踐臺省宏材碩  
度雅稱廊廟具當黨議消長之際持正不撓最為  
羣小所忌嫉屢跽而旋起晚而受知 宣廟及倭  
酋嫚書至首建正議請具奏皇朝壬辰亂作公起  
謫中尋膺大拜協贊 睿謨卒成恢復之烈策功  
麟閣譚者論中興相業公輒為稱首可謂盛矣公  
天資俊偉於詩文恒以餘贅眎之未嘗屑意時有  
興會輒信筆成章不事雕飾而一時宗匠諸公多  
稱賞其美所著述經亂放失存者僅若干篇公沒



三十載胤子今首台相公有韋平之拜遂輯公遺  
稿錄行之而命維敘焉噫公之德業勲績自足以  
名世垂後無所待於文詞也然觀自古名人鉅公  
其殘篇片語皆為後世所傳誦蓋人能使言重而  
言之傳益有以永其人之不朽也公之形容在冊  
青功業在國史而其精神之運性情之發大略寓  
於是編謂公之所以不朽全在是則不可謂此非  
不朽之一事亦不可請以是說弁諸卷

拙翁集序

本朝當 宣廟初號稱文明盛際文學正直之士



接武朝著自黨議起而不能無消長之變夫陽奇而陰偶奇者孤而偶者合故合者恒信而孤者恒誣以至辛卯之禍而世變極矣一時名公俊士舉被鉤黨之目而其尤者竄謫絕塞拙翁洪公其一也明年壬辰國有大難宗社播越天心悔悟悉召還諸謫人公赴行朝進拜冢宰大學士尋以憂去制未盡而即世朝野莫不痛惜始公弱歲以詞賦冠進士既登朝賜暇湖堂宣祖嘗庭試文臣公中魁選自是文譽益振遂拜藝文提學竟兼文衡為一代宗匠公於詩不以聲色為工一



主於理致要以暢其意而止為文本源經術該贍  
典實不為空言生平著述甚富而盡軼於寇難公  
能暗記而錄之得詩文九百餘篇公沒三十有九  
載冢孫禽者守永嘉始克鋟行公集屬維敘之維  
晚生未及識公而先君子實與公同被謫維又幸  
與公之胤叅議公同榜以是獲聞公名實之懿私  
心常切景慕託名卷端實有附驥之幸其何敢辭  
嘗聞孔氏四教文行居其先文者其華而行者其  
實也天之降才鮮能全備故四科之徒亦有偏至  
况其下者乎今公高才粹質倬焉窻儔和順積中



英華彪外德行著於儒林勲名載於國乘至其發  
於餘事者亦將炳烺紺素而垂諸不朽豈所謂彬  
彬君子質有其文者非耶洪氏自麗朝代出文人  
科第不絕及公之考若兄皆以文詞重於世然其  
家集之行至公始大著可謂盛矣

谿谷先生集卷之六



Vertical columns of text, likely bleed-through from the reverse side of the page. The text is mostly illegible due to fading and bleed-through.



谿谷先生集卷之七

序十六首

陰符經解序

昔吾夫子設教所雅言者詩書執禮而性與天道之妙雖高第弟子希得聞焉其見於論語禮記諸書者蓋絕無而僅有矣唯易大傳是夫子自著其精蘊故於性命之理最詳言之濂洛諸儒上達之論多得之於此孔子既歿而諸子之書出焉唯老子莊周明道德之趣其言時與易繫若有相契者然其大致以虛無為宗考其歸則似近而實遠其



餘百家之說求一言之近道者亦不可得矣陰符  
經者不知何代人所作唐李荃始傳之自言得之  
於驪山石室中道家者流尊其書而夸大之以為  
黃帝所受於廣成子或云黃帝與風后玉女所論  
著其言荒恠不經唯程子嘗稱老子甚雜如陰符  
經却不雜然皆窺測天道之未盡者又曰非商末  
則周末邵子亦云素問陰符七國時書也朱子亦  
嘗為之發揮蓋有取爾也以余觀此書其文辭之  
深博不及老莊遠甚然其所論天地陰陽之理頗  
與大傳太極兩儀之音相符合至其言性言心及



學術之要往往不悖於洙泗之教獨其中時有舛  
駁語如後世修鍊家說所以未能醇也竊意此必  
戰國之際隱淪君子有聞於性與天道者之所為  
也顧其學未必盡醇故其書不能無疵然求之諸  
子家言則未有若此者矣先秦諸書故多散軼不  
傳此書最晚出而不幸為李荃所得道家者流所  
傳會故人猥以異端視之莫有為之表章者向無  
程邵朱諸賢之論說斯書也其將闕沒而莫之白  
乎註解者甚衆余所觀一一家皆以二氏之說亂  
之不足以發明祇益為病往在丁未戊申間余方



弱冠始得此書讀而悅之妄以意見隨語箋解因  
置之不省者于今二紀餘矣前年冬余被疾幾殆  
者四閱月既少瘳索居無悞偶檢故書簾得此解  
閱之不覺整然有會心者延於呻吟之暇稍加修  
潤既成而叙其大略此書子也非經也其稱經者  
恐是李荃之徒所妄加耳以其沿襲已久因舊不  
改云

水城志序

郡邑之有志猶國之史也國史氏有常職然尚患  
紀載之多廢矧守宰職專理民能以餘力及於文



獻不亦難哉我東三百州郡名都雄鎮錯落相望  
而其有志者不能以十數此雖細事亦足為文明  
一闕事也吾友德水李汝固往歲為養乞外得杆  
城縣未滿秩以玉堂長官徵還在任甫踰歲矣乃  
能固羅故實撰水城志一卷杆在嶺東為小郡又  
絀彌為縣地遠而僻蓋陋邑也今得汝固貢餘之  
聲名文物將流布四方地因人顯詎不信然歟余  
於是又有所感焉往在己巳歲余貶官羅州羅固  
雄州也余雖不才較夫學士以出其於著述不可  
謂非其任也然余嘗有意於州志竟以病冗未果



為也噫以羅而失之於余以杆而得之於汝固是  
豈可徒諉之於適然而已哉以余之無所成益知  
汝固之勤且敏為不可及也書此以志吾愧

送吳肅羽巡察海西序

為為我之學者曰物生不願材也材則為人用為  
人用則病於身散木以不材壽雄鷄自斷其尾故  
曰巧者勞而智者憂無能者飽食而遨遊君子非  
之曰天之生物必使為之用也材者用而貴不材  
者用而賤貴者勞心賤者勞力心力無所勞而以  
自暇逸為得計者天民之蠹也械櫟至不材也而



盡於薪樵梗枿豫章之材也封殖而稱嘉樹焉盜  
驅乘黃之駟金羈月題一日千里而羸牂瘠牛命  
懸於庖厨以材不材為禍福者至此而說亦窮矣  
士之生世也懷材抱器出身事主及旅力之未憊  
經營四方以成尊主庇民之業乃其志也地不能  
無險夷事不能無劇易吾唯知隨所遇而致其力  
焉勞佚安危非所慮也吾友吳公肅羽南弱冠釋  
褐以文詞重於時既而稍稍發其才猷政事軍旅  
無所之而不可其少也故嘗佐元戎幕出入邊障  
習知兩西事宜及今上臨御最蒙獎拔每國有



重任推轂者希不及焉嘗奉使朝天矣又出按嶺南節矣朝天有涉海之險人所憚避嶺南之劇實甲於八路而數稔之間肅羽再履之矣自嶺南還旋拜承宣夙夜服勤者幾半歲會海西缺方伯遂擢授海西節夫海西重地也自丁卯中兵瘡痍未蘇朝暮有壇場之憂屬者海寇又與虜合一動則及於門庭憂固倍蓰於舊日矣乃今舉而屬之肅羽肅羽誠材也寧無以獨賢為歎者乎向使肅羽之材少貶與餘人等其歷試諸劇未必若是亟也雖然亦奚病哉古人有言曰不遇盤錯不別



利器操莫邪者理當割欲委其任於鉛刀何可得也海西誠難為也然自經亂以來君子知奮小人知懼懼者懲於失備奮者耻於受辱懼則戒戒則有備奮則勇勇則有為於斯時也乘其機而益激之鼓其氣而益厲之察其利病而興除之使民居則有安生樂業之心動則有親上死長之志則虜雖強不足畏此肅羽之能事也惟材故用唯用故勞勞而後方有成能欲有成而無勞乎肅羽所代者吾弟紳也吾弟自海西而進於關西比肅羽為益勞矣然皆王事也豈敢告病在邑而飲酒在



塗而雨行勞逸則懸矣賢不肖何如也請以是解  
肅羽又以解吾弟

送家弟顯國按節關西序

吾昆弟童年早孤奉太夫人零丁窮苦幸籍祖考  
遺澤及太夫人之教誨力學飭身粗有成立伯氏  
不幸早世而吾兩人際遭 聖明依日月之末光  
十年之中驟躋通顯吾以孱病既忝長天官大學  
士者各垂而吾弟亦入貳八座出典雄鎮至再建  
節領方面此誠衰門之至慶而布衣之極也每念  
國恩隆重無以報塞夙夜慚懼而已今年春吾弟



自畿南防禦使擢按海西至秋廷議重關西又授  
授關西節夫關西故是八路藩翰最重地自胡虜  
陸梁疆場之事殷矣今舉而屬諸吾弟其榮則至  
矣其憂與責當何如也况親年當喜懼而違離膝  
下不得奉晨夕之權仕宦本以為親今將未免貽  
戚吾弟當何以自解於心哉雖然吾少而嘗學詩  
矣圻父尸糲養之歎發於情也四牡將母之詠歸之  
義也吾家本貧今幸霑祿賜可以不乏甘旨而吾  
身雖病亦能粗脩溫清之奉則尸糲養之勞非所憂  
也吾弟業已身當王事靡盬在念宜亦不遑於其



他君親恩義有時而相輕重移孝為忠之訓所以著於經也吾弟其可不勉哉抑吾又有所論焉昔王陽為益州刺史行部至邛崃九折阪歎曰奉先人遺體奈何數乘此險遂以病去及王尊為刺史至其阪叱其馭曰驅之王陽為孝子王尊為忠臣漢史記其事後世兩羨之吾獨謂王陽誠孝矣然既出身事主夷險之變何所不有若為一畏道遂至去官則凡可以危身奉上者皆將不肯為耶王尊勇人也事不辭難固善矣然遇險而不戒若至於摧轅覆車以傷其身則傷於勇而反失其所



以為忠矣何其不思也受命不貳以盡瘁服勤為  
已任臨事而懼以暴虎憑河為至戒進足以報國  
退可以事親然後忠孝之道全矣吾弟勉之

芝峯集序

自維始省事每聞前輩諸公論當世第一流人必  
稱芝峯李公恒舉其字曰某甫金玉其人也維固  
稔聞而心識之既而遭罹否運世道交喪雖踰稱  
名士大夫者亦多隨流變化或刻方為圓或染貞  
為黷而賢者不幸往往觸兇釁冒禍罔顛連危阨  
者有之惟芝峯公恬穆自守危遜適宜凡世之滋



垢固不得以毫毛浼公即機辟爵羅亦無自而加  
諸公維時屏處田園每高公之趣操而竊嚮往焉  
及今上踐阼徵庸者詰而公登朝通顯為清流  
儀範維亦幸聯武朝列時時獲私於公公不以晚  
進見鄙輒為之傾倒揚推理義品隲藝文以至古  
今世務靡所不講維於是益服公遽學博識測之  
而彌深酌焉而不竭蓋占所謂大雅君子華藻之  
義特其土苴耳居久之進拜冢宰凜凜有台鼎之  
望而公遽即世矣公少而嗜學於書無所不觀於  
文詞無所不工而尤深於詩其為詩常疾世俗佻



儼噉噪之習必以唐諸名家為法則故其聲調諧  
為色澤朗潤有金石之韻圭璋之質焉文亦主於  
雅馴不作近代僻澁語玄軒申相公嘗稱公詩神  
而化之五山車天輅南窓金玄成亦以為格高語  
妙句圓意活優入盛唐閫域其見重於藝苑如此  
云傳曰德成而上藝成而下夫文章亦藝也世固  
有飾羽而畫以施蠟自售者矣惟深於天機者不  
然意發而後詞見焉質立而後文施焉美在其中  
而揚於外故曰詩可以觀若公之為者是已不知  
是何足以列於立言而稱不朽哉公既沒諸子以



公家集授剞劂而徵弁卷之文昔蘇長公於歐陽  
文忠張文定皆有知己之感故序其集而詞致深  
篤維之不佞誠無所比數獨於公積二十年景慕  
之私終見知於暮途區區感槩于中者自謂不後  
古人故不辭而為之序

南窓雜稿序

以下續稿

我東俗推鮮好事文人述作罕有鈇行於世者近  
歲稍稱右文操觚家競出遺集可謂盛矣然徐而  
察之未必皆其人也蓋其家世隆顯胤胄趾義則  
雖折揚皇考亦可以混響韶韻吐蹉之頃能令木



灾而紙貴即窮塗冷族雖懷雲夢之富溢隨和之  
珍沒世之後旋就湮滅是以孝標興秋草之感子  
駿有晉甄之譏雖關世情理亦宜爾余抱疾閒居  
今朝睡起盥櫛甫訖忽報海西信至乃方伯吳肅  
羽手簡也以新刊南窓稿一卷見餉書中自陳童  
年從南窓公遊挾筴周旋最蒙獎許公嘗手寫五  
七言律絕百餘篇見遺託以異日面目言甚悲切  
屬意似非偶然恒藏之篋衍不敢失墜及按海甸  
遂捐俸鏤梓既已告成雖不足為公不朽地要以  
自伸宿志庶幾不負公相託耳惟子亦雅知南窓



蓋以一言引之嗟乎古人重知己之感或有生來  
不識面孔而只為詩什中一語相許便託死生之  
契者况肅羽甫以妙齡英秀受知於斯文老成針  
芥之合迥出流輩則今之有斯後其亦衷情之不  
能自己者歟南窓公操履端粹學識淹雅詩文並  
美草隸無絕蓋所謂玉質金聲者而身沒無嗣門  
戶零替遺草殘墨將放軼無傳譚者為之歎惜肅  
羽甫此刻雖不能載公之全亦可使潛光發耀藝  
苑吐氣甚盛舉也樂道人之善者其可以無言乎  
南窓公金氏諱玄成字餘慶弱冠擢文科官至二



品以老壽終芝峯李公銘其墓稱道甚備云

頤菴集序

國制選儀賓事異前代既受爵便與朝紳殊籍內  
有尊榮豪貴之樂而外絕功名進取之慕故居其  
地者類多沉酣於聲酒綺紈菟博狗馬之玩其於  
砥行立名修辭游藝之事蓋有不暇念及焉夫唯  
豪傑特立之士乃能渺然高舉不以衆所同好役  
其志而獨留心乎其所不暇念及者以自託於儒  
林而流聲竹素此特百千之一耳若故礪城都尉  
頤菴宋公是已公天資過人實有卓志雋才身既



蚤貴乃獨痛刮豪習循循自飭積文種學視布素  
有加焉卒以行業詞翰名於世觀其所樹立不唯  
絕出流輩即號稱賢士大夫者亦無以遠過焉嗚  
呼可謂難矣歷觀前史尚主而賢者如王武子劉  
真長王子敬諸人其風流才致詎不標令可尚哉  
至其雍容禮法被服儒雅則視公或當少避嗚呼  
可不謂尤難乎哉公有詩文十數卷遭亂放軼存  
者猶若干卷公之孫某嘗鈔梓于昇平而藏之家  
久之不戒于火鬱攸所及板遂多缺今年曾孫熙  
業出宰杆城乃刊補其見燬者既成請維序之維



不佞自結髮聞公之風而知慕焉既而從諸老先生得見公禮說一二又從山人衲子卷軸之題得見公詩律又從碑版墨本得見公筆蹟而獨以未窺大集為恨乃今獲聞剗刷之役其何能已於言耶抑維於此又有感且戚焉維之先代與公有世雅高祖柳亭公以文章名世先君子少時嘗以遺稿就公刪定將鏤板而失於兵燹今無存者公之集雖不全猶能刻行於世是其一幸一不幸豈亦有數存焉歟數繫乎天人固無能如之何矣然其為子孫之遺憾何有窮已故余序公集而因併述



其感傷焉

成廟御製瀟湘八詠帖序

瀟湘八景之勝擅名海內古今詩人賦詠不勝其  
多而妍醜巧拙各隨其人惟我成宗大王萬幾  
之暇戲賦短律十六章每景各二章流傳藝苑咸  
以為在聖人誠為餘事終非詞人墨客所能到也  
我成廟下命元勳八人各寫二章唯延平府院君  
李貴未及寫進而歿從其家得草本字多剝缺紙  
亦不類乃命畫史李澄描以繪事聯為巨帖既  
成命臣維識之臣維竊聞詩固性情之發而書



亦心畫也。洪惟成廟以天縱多能之聖，神藻睿  
韻高出前代八詠之作，雖出於偶爾遊戲，無非陶  
寫性情之一端也。即諸臣筆蹟，各有長短，要之皆  
心畫之形於外者。我聖上之為是帖，上焉而對  
越聖祖，寓目咳唾之餘，亦足以起羹墻之慕，下  
焉而注念勳舊，觀其手蹟，不特如丹青之憶老臣  
顰鼓之思將帥，則茲事雖微，其所係之重，為如何  
哉！其視前世帝王留意書畫，耽賞光景，徒為玩物  
喪志之歸者，何啻穹壤猗歟，美哉猗歟，盛哉！

踈庵集序



始余讀易至節之甘苦歎曰甘節尚矣然不可必  
得節而至於苦則離於中道然非志之篤而守之  
確者亦詎能安於此哉世衰道微利欲橫流胡廣  
呂溫之中庸猶足以欺當世而特立獨行守節清  
苦之士往往見訾於流俗聖人之惡鄉愿而進狂  
狷其以是夫故友踈庵任茂叔有絕世之操其剛  
貞如金石冷潔如冰雪言論蘄截有壁立千仞之  
勢家世本華腴而生來不問產業既釋褐貧益甚  
陋巷矮屋不庇風日土床無藉脫粟不給人之見  
之者殆若無以為生而茂叔怡然自適未嘗有悴



色也光海時坐直道逆黜當權奸用事以罟獲鼎  
鑊制一世清名之士頗以遜默自晦而茂叔危言  
激烈不少挫中興之初歷揚臺閣高標直氣為  
士林所尚方駸駸嚮大用矣無何暴疾不起嗚呼  
苦節之士常患難於際合若茂叔初雖寒連既而  
遭時且顯用矣而竟夭闕豈所謂命與數者有以  
限之耶嗟乎惜哉茂叔才甚高記性絕人於書無  
所不覽覽即無所不記其學甚博為文章多腹  
藁立就其沒也門人權俟收取遺草就澤堂李汝  
固編定為五卷鏤板于中原縣監李侯培元連源



察訪姜與載實幹其後余謂茂叔生平著作必不止此蓋其放軼者多也然觀斯集者於排律大篇可以見其富於駢偶諸作可以見其精於讀國策游水鍾等文可以見其識雖其游戲漫興皆可以見趣操之所存嗚呼是足以不朽矣使世有良史將傳卓行文苑則疇能先茂叔而標名者不然而徒欲操空文以傳遠者抑末矣

漫筆自叙

人不可無所用心亦不能無所用心謂博奕猶賢乎已此夫子警夫惰游者然亦有有為不如無為



者顧人自不能爾余自幼鄙拙無它技惟以讀書  
著文為本業則平居捨是宜無所用其心也數年  
來有幽憂之病杜門謝事沉淹於藥餌砭熯之中  
于斯時也唯當極心澹泊塞兌葆光庶幾不悖於  
養生衛生之經矣習氣所薰不得頓除雖未嘗覃  
思結撰伏枕呻吟之暇時時拈筆草小說瑣聞綴  
有一二發明者餘食贅行道聽塗說皆歸於德之  
棄矣此亦不可已者耶雖謂之枉用其心可也業  
已為之不忍棄捐遂錄為一通因自志其過乙亥  
正陽之月谿谷病夫題



牧場地圖後序

馬政國之重務也周官校人實掌王馬之政而牧師掌牧地皆有厲禁而頒之夫畜牧猶稼穡以得地為先故周有非子而必取汧渭之間唐有張萬歲王毛仲而必就隴右河西而後馬大蕃息然則牧地又馬政之本也國家設牧場多在洲島蓋以就不食之地也國初盛時宜無有場而無馬者升平既久馬政漸弛當宣廟中年牧場之廢者多至四十餘所因經壬辰之變繼以昏朝亂政及丁卯虜難萬事無復舊觀即群牧之凋瘵無足



恠也臣曙待罪太僕有年所矣日夜思所以稱  
上任使之指建請慎簡監牧而嚴其課績其於馬  
政蓋不敢不盡其心力矣然計甲戌考牧匹數視  
平時殆減三之一而牧場之廢者幾乎加倍矣壞  
久者難補理亦宜爾臣曙謀於寮案曰馬之耗者  
猶可以漸息也牧地一失不可復得諸場之廢者  
多矣若因循隳弛為有力者所侵冒後欲復之不  
亦難乎今唯有修明舊籍俾後人有所考據不至  
失墜此吾輩事也本寺舊有牧場地圖經亂放失  
久矣廼令諸監牧各寫送牧場圖合為一編凡幅



負濶狹牧畜牝牡牧子多寡之數悉書于其上既  
成投進以備 睿覽藏其副于本寺又送春秋館  
藏諸史庫我國八道唯江原道無牧場京畿三十  
場有馬者十六所監牧官二負公清道十場有馬  
者四所監牧官一負全羅道四十二場有馬者十  
四所監牧官三負慶尚道二十一場有馬者四所  
監牧官二負咸鏡道六場有馬者五所監牧官一  
負黃海道十場有馬者七所監牧官二負平安道  
四場兵後皆廢摠之牧場百二十三所而有馬者  
五十廢者七十三耽羅在海外關西四場為遼民



所占箭串郊於國都故今皆不圖其餘皆圖塲之  
廢者往往募民開田收其入以佐芻秣或有入於  
諸宮及宅衙門者異時國馬漸蕃則當次第復舊  
此正今日作圖之意而深有望於方來者也臣維  
亦忝提調與聞其事謹以識諸卷末

### 馬經諺解序

人與物並育天地間得氣有偏正賦形有鉅細然  
其含生則均也古之人推仁民之心以及於物雖  
昆蟲魚鼈之微皆欲遂其生况六畜之用於人者  
乎畜之類莫如馬其為用可謂大矣故有國者莫



不以馬政為重夫欲馬之蕃在於善其養而除其疾而已馬之為物其五藏六府經絡血脈略與人同而寒熱燥濕飢飽勞佚皆足以致疾不究其理無以盡其治此馬醫諸經之所以作也國家既牧之政皆轄於罔寺完豐府院君李公曙實為提調常念馬病之難治而馬醫之懵於術也既鉞行馬經四卷又輯節其要義譯以諺語剗刷而廣布之將使輿僮厮役皆得以按方施治瞭然於心目一用心亦勤矣古者馬政莫備於周官既設校牧庾圉之職分理其事而又有巫馬掌養疾馬相醫而



藥攻馬疾馬夫治馬而至於兼用巫醫聖人之致  
其纖悉乃如此然則完豐公之纂是書亦可謂合  
於經義矣余幸忝寮案樂觀厥成而為之序云

谿谷草稿自叙

余結髮治文詞顛毛已種種矣世稱文人多夸嫻  
自喜然余實朴鄙每一篇成人或妄稱之徐而鏡  
考古作者未嘗不欲然自失即臨深以為高非其  
志也幼時所作既壯輒焚棄之中歲手抄雜稿詩  
文各如千卷閱十餘年而再忝文衡所著撰幾倍  
篋焉乃取文自癸酉以上詩自甲戌以上通前稿



而彙分焉詞賦十六表箋二十三教書十冊文三  
箴銘贊上三雜著四十說九序四十二記十五祭  
文三十八碑志二十六行狀五疏劄五十啓辭十  
七奏咨三十檄一呈文二帖四十五詩五言古百  
四十三七言古四十一五言律四百二十一五言  
排律四十四七言律四百三十二七言排律七五  
言絕五十七七言絕二百九十二六言十雜體四十  
四總千八百六十餘篇繕寫為二十六卷總而為  
者將日以續稿云家有弊帚享之千金惑也為覆  
瓿之譏而輟其業亦非達識也知我老幸勿見罪



壬午榜會帖後序

崇禎七年冬某月設壬午榜會于騎省之故廨會者八人而三議政在焉居久之右相仙源公以書命維曰司馬雖非大科登名于榜者類非童稚之儔自壬午至甲戌已閱五十三歲宜其人之皆老耄而在世者無多也吾榜二百人存者不能什一而居在京輦者只八人耳乃能同堂合席舉觴相屬蒼顏白髮共盡一夕之歡誠老境勝事也抑是會又有絕異可紀者夫司馬古上舍選也自上舍而登科第者稀矣登科第而得膺仕者又稀矣膺



仕而至金玉之班滋稀矣踰金玉之班而致身台  
鼎者又能有幾人哉一榜而有一人作相猶謂之  
難况吾輩三人同時鼎列聯席於一會者乎此盖  
夙絕前後所未有者咸曰不可以無紀也已作小  
帖圖其狀而錄其名氏子其為我文之維復曰榜  
會常事也其榜近者其會彌數常則不足紀也數  
則不勝紀也若茲會者誠可謂曠世稀覯者也會  
中諸公其齒高者固已踰八袞而上之最下者亦  
過七旬夫耆英九老固以齒會者今則不期齒而  
齒皆尊何其異也國有三丞相而同出一榜同會



一堂又同躋高壽嗚呼此豈人力之可致者 先  
朝得人之盛 昭代錫福之厚於此可見其一端  
請以是說識簡末

月沙集序

自歐陽氏論文章有窮而後工之語操觚家多稱  
引為口實夫雕蟲寒苦之徒風呻雨喟吟嘆飛走  
爭妍醜於一言半辭者以是率之猶可也乃若鴻  
公哲匠冠冕詞壇彰其色而黼黻青黃協其聲而  
笙簧金石以大鳴一世者此其人與才豈囿於窮  
達之域而格其巧拙哉應觀前代豪傑之士以文



章致身宰輔兼擅藝苑之譽者蓋曠世罕覯而唯  
我朝為最盛此殆祖宗右文之效若故相國月沙  
李公真其人哉公自布衣時已有盛名甫釋褐攝  
官起居注 宣廟臨朝見公記注瞻敏為倚案注  
目久之不覺研滴墜水沾公衣 命黃門拭之此  
公受知之始也兵亂後恒管樞院文書每一篇進  
上未嘗不稱善 錫賚相踵或命錄進草本及辯  
誣事起 特命進秩充副使所草奏本同時應制  
者凡數人而獨公作稱 旨華人見者萬口傳誦  
至廷臣覆議稱其明白洞快讀之令人涕泫泫欲



下自是公之文名遂震耀寰宇矣無何而踐八座  
握文衡為一代宗匠論者謂文人遭遇之盛古今  
鮮公比云 宣廟知公雖深然無如消長之數何  
竟未能究其用尋遘否運當彛倫變故之際守正  
不撓屢玷不測及今 上龍飛公與諸耆碩同被  
眷遇竟膺大拜艱危之日盡瘁彌綸惓惓忠愛之  
誠屢形於章疏而公亦已老矣公於文詞天才絕  
人雖高文大冊多口占立就而辭暢理盡自中繩  
墨 宣廟嘗稱之曰寫出肺腑溫籍典重其知公  
也至矣公既沒而諸子將行家集謂維嘗出公門



下辱徵弁卷之文噫公之文章不唯國人知之天下之人舉知之晚生末學強欲贅以一言是荷是為公重哉然維嘗觀 皇朝汪學士輝叙公朝天詩有曰生意泮然神理煥發卓異曹劉駕軼李杜夫汪公身生華夏文明之會其所見者大矣而朝天一稿在公特豹文之一斑耳然其稱道乃爾如使汪公盡見其所未見其為說豈止於是耶夫文章世固不乏若公雍容大雅得質文之備內以明主為知己外為中華所稱慕施之廊廟則藻飾治道用之急難則昭雪國誣名實純粹照映竹素



古人所謂經國大業不朽盛事者非公其誰當之  
公之詩文以卷計者八十有一而續集不與焉  
國朝名家集未有若是多者易大傳曰富有之謂  
大業不如是何以稱大家數嗚呼盛哉

故右議政楓溪金公自撰墓銘後叙

崇禎十年正月壬戌清兵陷江都故相楓溪金公  
死之兵既退諸子遍尋公體骸卒不得迺奉遺衣  
服斂諸棺用是歲某月日葬于揚州先塋某向之  
原公晚節嘗自為墓銘屬諸子曰我死毋為從人  
乞文以是納諸壙足矣至是諸子得之巾行中觀



者咸曰羨哉備矣詞約而事核不可以有加矣唯是公所未及紀者亦不可以無述也公少游牛溪成先生之門甫踰冠弁太學大為章甫所重己丑逆變起諸生應旨上疏推公為章首既釋褐歷踐清華宣廟朝嘗長諫垣入對極言宮禁不嚴之弊上厲聲詰曰所指有何事耶公對曰外間皆言某也將得某官某也有罪且見釋已而果然此臣所以言也相臣沈喜壽進曰金某此言可謂鳳鳴朝陽上意解答以溫旨明年春出為定州牧使秩滿還連為尚州安邊比六七歲不得處朝中



銘所謂一言嬰鱗三州製錦者此也公治郡有異  
政居三邑皆蒙表裏之 賜定人為立石以著去  
思癸丑大獄起公與玄軒申公秋浦黃公月沙李  
公等十餘人同被逮繫光海亦知公無它即釋之  
光海將廢 大妃奸臣脅百寮庭請之不從者禍  
且不測公終不一與焉西司啓請遠竄會光海自  
有所庇寢其事公連遭內外艱流落甚困銘所謂  
志不詭隨遜于荒野者也 今上踐阼公以 先  
朝宿望大被嚮用 皇朝降封典公承 命儉冊  
使丁卯之變為留都大將皆以稱職聞遂歷長兩



銓壬申春始拜相踰年以病免甲戌復入中書明年辭適公雖去位每國有大論議輒率意盡言終不以時議詆訛有所撓也丙子十二月清兵猝至上將幸江都命老病宰臣從廟社主先往公承命以行俄而敵兵逼京城江都路絕上幸南漢城南漢被圍四十餘日內外斷絕援兵至者輒潰敗而江都守備甚踈公憂之甚屢為任事者陳計策不見用人或勸公宜預為避禍計者公曰主上在園中安危未可知宗社嬪宮元孫皆在此吾獨何地圖免居數日敵用車載小舟直犯甲



串津人心驚擾敵舟乘虛疾棹抵西岸我兵在水  
陸者皆崩潰敵相繼大進無何先鋒至城下公知  
事無可為與家人訣解所著衣以與之遂上南城  
明樓積火藥于前麾左右使去左右或去或不去  
公取火投藥中烈焰忽起併樓屋捲去其未及去  
者皆與公同死正月二十二日也公享年七十有  
七天資剛方端確意有所定則雖賁育莫能奪其  
廉白之操絕出於人平居未嘗問產業立朝五十  
年位至三公而甌石屢空家人每稱貧以舉火衣  
無文線食不重肉至於祭祀品式皆酌其豐約之



宜令子孫遵行焉公少工書尤精篆籀國家大典禮須用篆文及公私碑額多出公手然公不甚自喜既老遇有求者輒以眼膏辭故人尤以得公蹟為幸焉公文游甚盛其執友五六公者皆世所稱第一流徃徃以文章德業致位卿相至其末塗樹立身後流芳則宜若無能先公名者雖然自世道言之寧不為不幸哉悲夫夫人 贈貞敬夫人安東權氏某官某之女先公四十二年而卒有子男三人長曰光炯旦卒次光燠春川府使次光炫文科戶曹叅判女長適司禦南好學次適判書張維



次適郡守李以省側室子曰光燭策振武勳抱川  
縣監女子四人光炯子壽昌司僕寺主簿光煥子  
壽弘進士光炫子壽仁祥原縣監曰某某幼女子  
五人南好學有一男三女男曰老星兵曹佐郎張  
維有一男一女男曰善澈李以省有四女光燭有  
一男四女內外孫曾男女若干人

谿谷先生集卷之七







